



Republika e Kosovës
Republika Kosovo / Republic of Kosovo

Kuvendi i Komunës Rahovec
Opština Skupština Rahovac/Municipality of Rahovec
Opština Rahovec - Opština ORAHOVAC
Opština për Administratë të përgjithshme
Opština za Opštu Upravu



PROCESVERBAL

Nr. i prot. 2334 Më 30.07.2019
Br. prot. Dt.
RAHOVEC - ORAHOVAC

Nga mbledhja e rregullt e Kuvendit Komunal të Rahovecit, e mbajtur më **28.06.2019**, me fillim në ora **10:15**. Mbledhjen e kryesoi: Kryesuesi i Kuvendit z. **Afrim Dina**. Konstatoi se kuorum, për mbajtjen e mbledhjes kemi:

Kryesuesi – Fillimisht më lejoni t’iu përshëndes, i nderuar Kryetar i Komunës z. **Smail Latifi**, Nënkryetar i Komunës z. **Fatmir Iska**, drejtor të drejtorive Komunale, pjestarë të KFOR-it, përfaqësues të OSBE-së, gazetarë dhe media, dhe juve kuvendarë të nderuar. Para se t’iu lexoj rendin e ditës, fjalën ia jap Kryetarit të Komunës z. Smail Latifi.

Kryetari – Përshëndetje për të gjithë të pranishmit! Ka qenë një kërkesë e kahershme që anëtarët e Kuvendit të Komunës së Rahovecit të pajisen me laptop, besoj se në fund të kësaj mbledhje përgjegjësi i IT-së do t’i kryej ato punë teknike dhe do t’iu shpërndahen laptopat secilit anëtar të Kuvendit. Kisha kërkuar nga ju që në fund të mbledhjes të merrni një vendim që këta laptop t’iu mbesin në shfrytëzim edhe pas mandatit, besoj se kësaj praktika kanë edhe komunat e tjera e jo vetëm ne. Arsyeja është se teknologjia është duke avancuar ditë për ditë dhe ka mundësi që pas dy viteve të dalin pajisje më të reja, dhe këto nuk do të bëjnë punë ashtu siç duhet dhe ndoshta edhe këto duhet të ndërrohen për të kryer punë siç duhet.

Kryesuesi – Të nderuar kuvendar, është bërë përpjekje dhe është arritur që edhe ne si Kuvend të kemi pajisjet e domosdoshme për punën që do të bëjmë. Kjo është kërkuar nga ana jonë edhe për arsye se është duke u bërë shpenzim goxha i madh gjatë shtypjes së materialit si për KPF ashtu edhe për mbledhje të Kuvendit. Pastaj, disa herë kemi patur probleme me dërgesë të materialit fizik sepse shumë herë disa kuvendarëve nuk i ka shkuar me kohë materiali në shtëpi. Të nderuar kuvendar kemi edhe një kërkesë që të shtohen edhe dy pika shtesë, kjo do të realizohet nëse ju jeni të pajtimit. Pikat shtesë janë: Shqyrtimi dhe aprovimi i Propozim-vendimit të Kryetarit të Komunës, për formimin e komisionit vlerësues të ofertave për dhënien e pronës së paluajtshme të Komunës në shfrytëzim, afatshkurtër dhe afatgjatë, sipas udhëzimit të ri administrativ ky komision duhet të i ketë 5 anëtar, pra nga 7 sa i ka. Dhe Shqyrtimi dhe aprovimi i Propozim-vendimit të Kryetarit të Komunës për “Formimin e komisionit për shqyrtimin e ankesave”. Ky komision nga 3 sa i ka duhet të i ketë 5 anëtar. Pra këto ndryshime duhet të bëhen në numrat e anëtarëve të komisionit, sepse tani ka dalë një udhëzim i ri administrativ ku na obligon të gjitha Komunat e Republikës së Kosovës që t’i bëjnë këto ndryshime. Për më shumë e ftoj z. Isak Hotin, shefin e zyrës ligjore.

Isak Hoti – Përshëndetje për të gjithë të pranishmit! Të nderuar të pranishëm, ne në muajin Shkurt i kemi nxjerr dy vendime të cilat i ceku Kryesuesi, ligji i ri ka hyrë në fuqi për dhënien në shfrytëzim të pronës komunale me datë: 03 prill 2019, dhe ky ligj neve na obligon që ne t’i plotësojmë dhe ndryshojmë vendimet në bazë të këtij ligji. Arsyeja dhe faji i vetëm është i imi, sepse në kohën kur është dashur të vijnë këto vendime në Kuvend, i kam harruar, prandaj nëse ju pranoni dhe jeni të gatshëm këto janë thjeshtë formim i komisioneve dhe nuk e besoj se ka diçka për tu shqetësuar. Tek komisioni për ankesa nuk i kemi më 3 anëtar por 5, dhe nuk i kemi më 7 anëtar tek komisioni vlerësues por i kemi 5 anëtar, besoj se përsëri keni mundësi të bëni një kombinim. Kërkoj mirëkuptimin tuaj në mënyrë që mos të mbesim prapa me vlerësim të ofertave dhe të ankesave. Neve edhe ashtu edhe një muaj e gjysmë kohë na shkon deri sa t’i finalizojmë këto dy vendime.

Kryesues – Tani të nderuar kuvendar, e vë në votim Propozimin e Kryetarit të Komunës sa i përket pikës për marrje të vendimit që laptopat që do i merrni të mbesin tek ju edhe pas përfundimit të mandatit si kuvendar. Konstatoj se është aprovuar propozimi i kryetarit që si pikë shtesë të jetë edhe pika e lartë cekur. Të nderuar kuvendar, i vë në votim pikat shtesë që të jenë pjesë e kësaj mbledhje: **Konstatoj se në mënyrë unanime është aprovuar që këto dy pika shtesë të jenë pjesë e kësaj mbledhje.** Tani të nderuar po ju

lexoj rendin e ditës me këto tre pika shtesë, besoj se rendin e ditës dhe materialin e keni marrë me kohë?
Për këtë mbledhje propozoj këtë:

REND DITE

1. Shqyrtimi dhe aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Informatë e Raportit Financiar vjetor të Komunës së Rahovecit për vitin 2018 e Auditorit Kombëtar,
4. Shqyrtimi dhe aprovimi i Propozim - vendimit të Kryetarit të Komunës për këmbimin e pronës Komunale,
5. Shqyrtimi dhe aprovimi i Propozim - vendimit të Kryetarit të Komunës për dhënien e pronës në shfrytëzim afatshkurtër për raste të veçanta,
6. Shqyrtimi dhe aprovimi i Propozim - vendimit të Kryetarit të Komunës për Shpalljen me interes të përgjithshëm pjesa e parcelës P-71510057-02240-1, në sipërfaqe prej 110000 m² në Rahovec,
7. Shqyrtimi dhe aprovimi i Propozim - vendimit të Kryetarit të komunës për Shpalljen me interes të përgjithshëm pjesa e parcelës P-71510057-02240-1, në sipërfaqe prej 42099 m² në Rahovec,
8. Informatë nga Drejtoria për Kulturë, Rini dhe Sport për objektet e trashëgimisë kulturore – historike të Komunës së Rahovecit,
9. Shqyrtimi dhe aprovimi i Propozim - vendimit të Kryetarit të Komunës për formimin e komisionit për shqyrtimin e ankesave për emërtimin e rrugëve dhe shesheve në Komunën e Rahovecit,
10. Shqyrtimi dhe aprovimi i Propozim - vendimit të Kryetarit të Komunës për formimin e komisionit për emërtimin e rrugëve, shesheve dhe lagjeve në Komunën e Rahovecit,
11. Informatë mbi menaxhimin e mbeturinave në Komunën e Rahovecit për vitin 2019.

PIKAT SHITESË

12. Shqyrtimi dhe aprovimi i Propozim - vendimit të Kryetarit të Komunës për formimin e komisionit vlerësues të ofertave për dhënien e pronës së paluajtshme të Komunës në shfrytëzim afatshkurtër dhe afatgjatë,
13. Shqyrtimi dhe aprovimi i Propozim - vendimit të Kryetarit të Komunës për formimin e komisionit për shqyrtimin e ankesave,
14. Shqyrtimi dhe aprovimi i Propozim - vendimit të Kryetarit të Komunës për dhënien e Laptopave të anëtarëve të Kuvendit.

Kryesuesi – A ka dikush të shtoj diçka sa i përket pikave të Rendit të ditës? Nëse jo, atëherë e vë në votim rendin e ditës. Për këtë mbledhje me pikat shtesë: Konstatoj se unanimisht është aprovuar Rendi i ditës. Kalojmë në pikën e parë të rendit të ditës:

1. Shqyrtimi dhe aprovimi i Procesverbalit nga mbledhja e kaluar.

Kryesuesi – A ka dikush të jap ndonjë vërejtje apo ndonjë sugjerim sa i përket procesverbalit nga mbledhja e kaluar?

Fehmi Cena – Përshëndetje për të gjithë të pranishmit! I nderuari Kryesues, te diskutimi im faqe 4 është bërë një gabim teknik tek rreshti 6, do të ishte mirë që ky gabim teknik të përmirësohet.

Kryesuesi – Ju faleminderit z. Cena gjithsesi se do të përmirësohet ky gabim teknik, a ka edhe dikush të shtoj diçka sa i përket procesverbalit, nëse jo atëherë e vë në votim Procesverbalin nga mbledhja e kaluar:

Konstatoj se në mënyrë unanime është aprovuar pika e parë (1) e rendit të ditës. Kalojmë në pikën e 2 të rendit të ditës:

2. Pyetjet dhe përgjigjet në pyetjet e këshilltarëve.

Mirjeta Krasniqi – Përshëndetje për të gjithë të pranishmit! Pyetja e parë i nderuar: ne banorët e ndërtesave të reja që janë afër Komunës e kemi dorëzuar një peticion, në lidhje me problemin që janë duke hasur banorët në bartjen e pronës në emër të vetin, pyetja ime është: Sa keni punuar ju si institucion për të bërë diçka në këtë drejtim? Nëse ju nuk keni mundur të gjeni mekanizma ligjor unë propozoj që ajo kërkesë të vijë në Kuvend, dhe pastaj ne si Kuvend ta formojmë një komision dhe të vazhdohet me procese ligjore të mëtutjeshme. Pyetje e dytë, ka të bëjë me parkingje, jemi duke parë çdo ditë gjendjen aktuale të mungesës së parkingjeve, tani edhe policia është duke i dënuar të gjithë ata që i parkojnë makinat në rrugë dhe trotuare dhe që po ndodhë është shumë mirë. Propozoj që të ndërtohet një parking në vendin ku ka qenë shkolla e mesme afër objektit të zjarrfikësve, dhe kjo hapësirë të shfrytëzohet për parkingje. Pyetje e fundit është: ku ka mbetur procesi i ujit të pijes të fshatit Pastasel?

Fehmi Hoxha – Përshëndetje për të gjithë të pranishmit! I kam dy kërkesa ose sugjerime. Ne e dimë që Qeveria e Republikës së Kosovës ka marrë një vendim për mbylljen e të gjitha lojërave të fatit ose basteve sportive. Por, ne si komunë e kemi ende në fuqi rregulloren 01 Nr.576, të datës: 28.02.2017, në atë kohë është bërë plotësim ndryshimi i kësaj rregullore, ku janë liruar 63% të bizneseve nga taksa komunale. Duke marrë për bazë tani vendimin e Qeverisë dhe shumë taksa që është dashur të inkasohen tani më nuk do të inkasohen sepse janë mbyllur të gjitha lojërat fatit, prandaj propozoj dhe kërkoj nga Drejtori për Ekonomi dhe Zhvillim Ekonomik, duke u bazuar në lëvdatat e mëdha që i ka marrë nga USAID-i për lehtësirat në zhvillimin e bizneseve, që t'i zhvilloj procedurat për plotësim-ndryshimin e rregullores për taksa dhe tarifa. Pastaj të gjitha bizneset që janë në Komunën e Rahovecit të lirohen nga taksa komunale që është diku rreth 200-250 €. Me këtë veprim besoj se do i marrim poenat edhe më pozitivë në të ardhmen si Komunë, po

ashtu besoj se shumë grande do të vijnë në Komunë, si nga ana individuale që kërkojnë bizneset komunale ashtu edhe si Komunë.

Kërkesa tjetër është për Drejtorinë e DSHPS-së. I nderuar më parë barnatoret kanë punuar në Rahovec me një orar prej 24 orë, personalisht e kam rastin por ka edhe raste të tjera nuk jam vetëm unë, pas orës 23:00 në Rahovec çdo barnatore e ke të mbyllur, ne që kemi nevojë duhet të shkojmë në Gjakovë që ti blejmë barërat elementare. Kishte me qenë mirë që Drejtori t'i ftoj të gjithë këta pronarë të barnatoreve dhe të mbajë një takim, që të bëjnë një orarë ku të paktën një barnatore të qëndroj e hapur për 24 orë, shumica e komunave e kanë këtë rregull.

Afërdita Thaqi – Përsëritet për të gjithë të pranishmit! E kam një kërkesë. Të nderuar besoj se njëra ndër kërkesat më të domosdoshme dhe më emergjente është që të bëhet rruga dhe mbrojtja e banorëve të shumë fshatrave, e sidomos e fshatit Kramovik dhe Çifllak. Për arse se nga gropat e zhavorit dhe të shtratit Drini i Bardhë ne i kemi pasur dy viktime, njëri nga fshati Çifllak dhe tjetri nga fshati Kramovik. Këto dy fshatra dhe fshatrat e tjerë deri tek fshati Xërxë që shtrihen buzë lumit Drini i Bardhë, janë të rrezikuar qoftë nga lumi, qoftë nga gropat e zhavorit. Kërkoj nga Komuna dhe institucionet më të larta që të ndërmarrin masa deri sa nuk është bërë shumë vonë. Kjo pjesë poashtu çdo ditë bëhet më e rrezikuar nga gjallesat e ndryshme. Ideja ime është që buzë shtratit Drini i Bardhë të ndërtohet një rrugë dhe krahas rrugës të bëhet mbrojtja nga Drini i Bardhë, dhe ndoshta me këtë një ditë do ti kthehet bukuria e kësaj pjese ashtu siç ka qenë dikur, besoj se nuk është e vështirë të gjenden mjetet për këtë punë, por mendoj se duhet më shumë angazhim nga Komuna, pastaj lënda e parë që është zhavori gjendet dhe sigurohet shumë lehtë. Për këto investime po ashtu ka donacione që jepen nga Bashkimi Evropian, pasi këta ndihmojnë shumë në projekt për mbrojtjen e tokave dhe lumenjve, por një gjë duhet të kemi të qartë që Bashkimi Evropian investon vetëm atëherë kur bëhet projekti, kurse për projekt besoj se duhet të kujdeset Komuna si në nivelin lokal ashtu edhe në atë qëndror, për realizimin e këtij projekti kërkoj mbështetjen e Kryetarit të Komunës.

Vahid Krasniqi – Përsëritet për të gjithë të pranishmit! I nderuari Kryetar, në Kodin Buxhetor vitin e kaluar kemi futur ndërtimin e disa rrugëve dhe kanalizimeve në fshatin Drenoc, këto rrugë nuk janë përfunduar ende, disa punime janë ndërprerë në gjysmë. Një kanalizim afërsisht me distancë prej 100 m ka mbetur në gjysmë, kjo është tek lagja Makshana. Ky kanalizim që nga mandati i kaluar ka mbetur ashtu edhe pse është premtuar që do të rregullohet. Pastaj i kemi edhe dy rrugë të pa përfunduara në fshatin Senoc edhe këtu janë ndërprerë punimet edhe pse janë të përfshirë në Kodin Buxhetor. Po ashtu desha të bëjë një pyetje rreth riparimit të shkollës në Drenoc. Është fituar një projekt nga Bashkimi Evropian, ku ka mbetur ky projekt pse nuk është duke filluar? Pastaj, në fund është bërë një riparim i pjesës së rrugës tek ura, por për shkak të vërshimeve të fundit që kanë qenë, përsëri kjo rrugë është dëmtuar, desha të ngris së çështje që edhe kjo rrugë të rregullohet. I nderuar Kryetar, në rrugët e fshatit Drenoc mungojnë pengesat të cilat quhen “policë të vdekur”, siç e dini shkolla jonë është mbi rrugë dhe të gjithë nxënësit duhet patjetër të kalojnë rrugën që të shkojnë në shkollë, nxënësit janë të rrezikuar nga makinat, prandaj ju kisha lutur që të merrni parasysh këtë kërkesë.

Dervish Çadraku – Përsëritet për të gjithë të pranishmit! Kam një pyetje rreth një raporti që është dashur të jetë sot në Kuvend, pra raporti mbi gjendjen e dëmeve pas të reshurave që kanë ndodhur në Komunën tonë? Pastaj pyetja e dytë është: Si qëndron puna e mirëmbajtjes së parqeve si të qytetit ashtu edhe në vende tjera kudo që gjenden ato?

Shqipe Kryeziu – Përsëritet për të gjithë të pranishmit, pyetje ime i drejtohet Kryetarit të Komunës, i nderuar, pse është duke heshtur projekti i Shkollës së Muzikës, e cila shkollë ka një numër të madh të nxënësve, u bënë 7 vite që këta nxënës janë pa objekt.

Ali Zhuniqi – Përsëritet për të gjithë të pranishmit! Sa i përket dëmeve të shkaktuara nga reshjet e fundit që u janë bërë ekonomive familjare, e kërkoj një raport edhe z. Çadraku, pyetje ime i drejtohet Kryetarit të Komunës: I nderuar Kryetar, kolegu juaj, Kryetari i Suharekës, dëmet e vitit të kaluar u janë kompensuar me aq sa ka pasur mundësi, drejtorët që janë përgjegjës për këtë punë, e kam parë që edhe tani por edhe në vitin e kaluar kanë dalë në teren që të marrin të dhënat sa i përket dëmeve të shkaktuara, nuk e di se në cilën bazë

dalin që të bëjnë vlerësimin e ekonomive familjare, kur ne e dimë që dëmet nga viti i kaluar në amvisëri nuk janë paguar, kurse tani jeni duke bërë përsëri llogaritje të dëmeve.

Munib Durguti – Përsëritet për të gjithë të pranishmit! Desha të ju paraqes një shqetësim tek rruga e Gjimnazit “Xhelal Hajda – Toni”, pas reshjeve të shiut që kanë rënë në kohën e fundit në Komunën tonë, ju kujtoj se me rrethimin e oborrit të Gjimnazit është krijuar një gjendje shumë e rëndë për banorët e kësaj lagje. Këtë problem e kam diskutuar edhe me drejtorin z. Përparim Krasniqi, në kohën kur është bërë rrethimi i oborrit të shkollës, ju kam bërë me dije se ajo pjesë është niveli më i ulët i lagjes, dhe në këtë pjesë akumulohen të gjitha ujërat që vijnë nga rrugët e epërta siq është rruga “Gëzim Hamza – Piktori”, pastaj “Martirët Abazibra” e kështu me radhë. Në atë kohë kam kërkuar që përfund murit të lejohet një By – Pas, ku ujërat që vijnë nga rrugët e tjera të derdhen në oborrin e gjimnazit dhe në këtë formë të shkojnë në rrjedhën normale tek lumi Dullo. Kjo nuk është bërë edhe përkundër sugjerimit të inxhinierëve Komunal z. Topalli dhe z. Kadiri, të cilët kanë qenë në teren, poashtu edhe ata e kanë konstatuar se kjo duhet të bëhet në formën që e përmenda më parë, pra si pasojë e mos bërjes së kësaj e tërë lagja është vërshuar nga vërshimet që kanë ndodhur ditët e fundit. Më të rrezikuar janë familja Shala, sepse në secilën reshje që e kemi pasur kohën e fundit uji i ka hyrë në oborr dhe podrumet e shtëpive, kërkoj që të bëhet ndërhyrja e nevojshme dhe të funksionoj ashtu si duhet, e di që ne nuk mundemi me e ndalë shiun, por si qeverisje Komuna na takon që ti ndalim shkaqet që mos me i rreziku banorët. Pasta, po ashtu edhe ky shqetësim që do e paraqes tani ndërlidhet me të parin, të nderuar pas këtyre reshjeve lumi Dullo nuk ekziston në disa segmente, e sidomos mbrapa kafiterisë Konaku, e kisha ftuar Kryetarin që të del në teren së bashku me Drejtorin dhe inxhinierët Komunal dhe të bëjnë një zgjidhje emergjente. Ky lumë duhet të pastrohet, unë e shoh që si pasojë e mbushjes së këtij shtrati kanë pësuar shumë banorë nga këto reshje, siç janë familja Canziba dhe disa shtëpi që janë afër tyre. Nëse ka mundësi do të ndërlihdesh me kërkesën që e bërë kolegja znj. Mirjeta Krasniqi sa i përket ndërtimeve të reja të ndërtesave që gjenden afër Komunës të cilat ende nuk kanë pranim teknik. Para disa muajve e kam ngritë edhe unë këtë çështje në Kuvend ku kam biseduar me Drejtorin, dhe kemi kërkuar që të iniciohet procedura e pranimit teknik, në mënyrë që banorët e këtyre banesave ta fitojnë të drejtën pronësore. Në aspektin tjetër po ashtu edhe Komuna ka një humbje të madhe sepse nuk i takon këto banesa që 20 vite, e di që nuk është e lehtë kjo por besoj se secili problem e ka zgjidhjen aty ku është vullneti, kishte me qenë mirë që me vullnetin e Kryetarit të komunikojmë me zyrat ndërlihdëse dhe të gjejmë një formë që këta banorë ta fitojnë pronësinë ashtu siç i premtim ligji.

Fehmi Cena – Çështja të cilën desha të diskutoj në fakt u diskutua nga parafolësi, por unë do të japë kontributin tim, sa i përket çështjes së vërshimeve kohëve të fundit, me një theks të veçantë në qytetin e Rahovecit. Sa herë bie shi qyteti po vërshohet nga ujërat, dhe po krijohen dëme nëpër shtëpitë e qytetarëve, përveç dëmeve, çdo vërshim ngre në vete edhe rrezikun e shpërthimit të ndonjë epidemie, e aq më tepër që ne tani jemi në muajt e verës, gjatë vërshimeve ujërat e kanalizimeve dalin jashtë, përzihen me ujërat e pijes etj. Mendoj se duhet të gjendet një zgjidhje në theks të veçantë për qytetin e Rahovecit, ne e dimë se Rahoveci e ka reliefin karakteristik dhe ujërat mblidhen shumë lehtë poshtë në qytet, por mendoj se zgjidhja duhet të gjendet, dhe për këtë përgjegjësi është Komuna. I nderuari Kryetar duhet të investohet më tepër në ndërtimin e kanalizimeve për ujërat atmosferik, nëse mbetet kështu besoj se edhe në të ardhmen do të ketë vërshime jo në mënyrë lokale por në mënyrë të përgjithshme. Sa më kujtohet mua investimet janë bërë shumë më herët në kohën kur kanë qenë në pushtet LDK-ja, ku është bërë rrjeti i kanalizimit për ujërat atmosferik rreth 1.5 km, prej asaj kohe nuk e di nëse është bërë diçka në këtë drejtim. U cekë po ashtu edhe kanali i lumit Dullo, ky kanal duhet të pastrohet së paku një herë në vit, por nëse ka nevojë edhe dy herë në vit, sepse me të vërtetë ky kanal është mbushur me zhavorr dhe mbeturina të ndryshme, për këtë arsye nuk ka kapacitet për tërë sasinë e ujit kur bie shi. Propozoj që drejtoria përkatëse të na përgatit për mbledhje të ardhshme një raport në lidhje me këto vërshime, në mënyrë që ti shohim shkaqet e vërshimeve dhe ne si Komunë pastaj dhe si asamble të ndërhyjmë, dhe të gjenden metoda që në të ardhmen të zgjidhet ky problem.

Masar Popaj – Përshëndetje për të gjithë të pranishmit! Pyetja ime i drejtohet Drejtorisë për Punë Inspektuese, Inspektorati i Higjienës Sanitare kanë vizita të shpeshta në teren, ku i bëjnë vizitat lokaleve të ndryshme dhe e bëjnë një punë të shkëlqyer. Pyetja ime është: I nderuar, a e ka inspektuar Inspektorati ndonjëherë objektin e vjetër të Komunës, pasi që në këtë objekt higjiena vërehet që nuk është në nivel, si në tualete, shkallë, korridore e mos të themi edhe nëpër zyre. Po ashtu e pyes Drejtorin se punëtorët shëndetësor si mjekë, infermier etj, a janë të pajisur me librezë sanitare, pas vizitës së bërë në QMF në fshatin Fortesë, stomatologjia e kësaj ambulante më tha se i mungon një helioaparati për pastrimin e dhëmbëve me emrin Kavitron, po ashtu edhe karrika është jo funksionale.

Rexhep Oruçi – Përshëndetje për të gjithë të pranishmit! I nderuar, do e potencoj edhe një herë çështjen e pensionistëve të moshës së tretë, pasi që si duket pas 6 viteve, këtë vit për herë më parë do të mbesim pa u subvencionuar nga Komuna. Këtë vit për shkaqe procedurale do të mbesim, kam biseduar me Kryetarin e Komunës, ku më njoftoi se Komuna ka bërë një shpallje publike për Organizatat Joqeveritare ku ne duhet të aplikojmë. Atë shpallje nuk kam mundur me e pa dhe si duket kam aplikuar me vonesë. Po në asnjë përgjigje nuk e kemi pranuar nga Komuna që së paku të na informojnë që shkresa jonë është refuzuar, pastaj ju kam drejtuar Kryetarit të Komunës në emrin personal, është mirë që të kryhet kjo punë sepse i kemi rreth 3000 anëtar të pensionuar, dhe mos na krahasoni me Shoqatën e Sindikatave të Pensionistëve, Shoqatën e Fadil Durgutit, që i ka anëtar 50 arsimtar të pensionuar. Ata po ashtu e kanë bërë një Shoqatë Pensionale e cila është po ashtu kundër ligjit, ata e kanë bërë vetëm që ti marrin ato 3 pagat e fundit që duhet Komuna t'i paguaj. Këtë çështje e kam ngritur edhe para dy muajve me Nënkryetarin, por ai më thotë se ju keni dualizëm, Nënkryetar ju jeni Jurist - i thash sikurse që është z. Qazim Qeska dhe unë. Të nderuar nuk ka kurrfarë dualizmi, nuk e di interesat e kujt i mbron ajo Sindikatë. Vitin e kaluar ata morën subvencione nga Komuna njëjtë sikurse ne, edhe pse ata janë 50 anëtar, kurse ne jemi 3000 anëtar. Këtë vit si duket nuk do ti kemi as këto mjete, por, po ju them se ligji për asocimin e Organizatave Joqeveritare është decidivë dhe ky ligj në nenin 1 thotë: Se ky ligj nuk vlen për Parti Politike, nuk vlen për Sindikata dhe Organizata Sindikale etj. pra kjo është kundërligjore kurse ne jemi duke e subvencionuar, po ashtu edhe zyrat ia kemi dhënë, vitin e kaluar me ato mjete që i kanë marrë nga Komuna, 3 veta kanë shkruar në pushime. Të nderuar, ne jemi Shoqatë e regjistruar në MAPL etj. Të nderuar, Komuna mjetet për Shoqatën e Pensionistëve i kanë të ndarë edhe në Kodin Buxhetor, ne nuk jemi duke kërkuar atë, por, ju lutem mos na lini në harresë, sepse ne në vit ka raste që japim deri në 30 raste ndihma momentale me shumën deri në 50.00 €, ka pensionistë që nuk kanë as barna esenciale me i ble. Prandaj, po ju them mos u rrudhni kur bëhet fjalë për njerëzit e moshës së tretë sepse dashtë Zoti do ta keni shëndetin edhe ju Kryetar dhe të mbërrini këtë moshë.

Kryetari – Ju faleminderit të gjithëve për pyetjet e parashtruara! Të nderuar, me të drejtë plotë shqetësime janë me vend dhe janë legjitime, do mundohem të ju japë disa sqarime që bien në përgjegjësinë e Kryetarit të Komunës, kurse një pjesë të përgjigjeve do ju japin drejtorët e drejtorive përkatëse. Po ja filloj nga pyetja e fundit, i nderuar z. Rexhep Oruçi, sipas ligjit, ne subvencionet duhet që ti japim në bazë të thirrjes publike për aplikim, ne e kemi pas një thirrje, por siç e tha edhe i nderuari z. Oruçi ndoshta ka pasur mungesë të informatave, ose ka bërë aplikim me vonesë. Të gjitha Organizatat që kanë aplikuar për subvencione i kemi trajtuar, më vie shumë keq që nuk është përfshirë Shoqata e Pensionistëve të Rahovecit në këtë thirrje, por kjo ka ndodhur sepse nuk ka pasur aplikacion, por ne nuk e kemi harruar këtë shoqatë sepse jam i interesuar që ti mbështesë, do të shohim se cila do të jetë mundësia jonë si Komunë që ti dalim në ndihmë Shoqatës së Pensionistëve sa më parë që është e mundur.

I nderuari z. Fehmi Cena, z. Ali Zhuniqi, z. Munib Durguti dhe disa të tjerë kanë bërë pyetje sa i përket çështjeve të vërshimeve, të nderuar kohëve të fundit ka pasur vërshime të shumta, posaçërisht në qytetin e Rahovecit, Fortesë, Pataqan të Ulët, Drenoc, Hoçë të Vogël dhe Brestoc, por kryesisht dëmet kanë dominuar në qytetin e Rahovecit. Ajo që kemi bërë ne si Komunë është se të gjitha ekipet dhe njësitë tona maksimalisht, janë përpjekur që të bëjnë aq sa kanë pasur mundësi të bëjnë në situata të tilla. Por ç'farë kemi bërë pastaj? Ne si Komunë kemi formuar komision për vlerësim të dëmeve, si në amvisëri, në ekonomi familjare dhe në bujqësi. Para meje e kam një raport të dëmeve në amvisëri dhe totali i dëmeve

është 98,244.00 €, kjo është sipas komisionit profesional që është themeluar me vendim të Kryetarit të Komunës. Ne ende nuk e kemi raportin e dëmeve në bujqësi, arsyeja është se ne nuk mundemi të angazhojmë vlerësimin e dëmeve në bujqësi njerëz jashtë administratës Komunale për momentin, siç e dini tani për tani Drejtoria e Bujqësisë ballafaqohet me pritjen dhe absorbimin e të gjitha kërkesave dhe nevojave që kanë fermerët në aplikim për grande të cilët vinë nga Ministria e Bujqësisë. Pastaj për subvencione dhe thirrje direktë që është një tjetër subvencion nga Ministria e Bujqësisë edhe pse këtë vit janë vonuar pak, pastaj Drejtoria e Bujqësisë është e mobilizuar që ti shqyrtoj edhe situatat që janë bërë nga dëmet e vitit të kaluar. Komisioni për vlerësimin e dëmeve ka dalë në teren por ende nuk e ka sjellë raportin sepse duhet edhe disa ditë angazhim, nëse ka nevojë edhe ditëve të shtunë në mënyrë që ta kemi raportin nga dëmet në bujqësi.

U përmend nga z. Zhuniqi Suhareka, i nderuar, Suhareka vitin e kaluar është vlerësuar në infrastrukturë publike dhe amvisëri në vlerën prej 1,100,000.00 €, por atyre nuk ju është kompensuar dëmi në bujqësi i cili nuk është 5,700,000.00 € sikurse tek ne, por, është përafërsisht 2 milion. Ne e kemi marr shpërblimin 1 milion vetëm në bujqësi, por jo edhe për dëme në amvisëri. E di që situata nuk është e mirë me ujërat në qytet, nuk është çështje me e akuzu dike sepse secili në mënyrën e vetë është munduar me bë një zgjidhje këto 20 vite, mos harroni se këtu ka ndërtime të egra, ka ndërtime të reja, ka ndërtime nëpër territore të lumenjve, pastaj ka prona private përkaj lumit Dullo. Pozita gjeografike e qytetit të Rahovecit është e tillë që prurjet e ujit vinë nga të gjitha pjesët dhe derdhen tek rruga kryesore “Xhelal Hajda – Toni”. Pastaj ju e dini se gypin kryesor të qytetit e ka për detyrë që të bëjë pastrimi KRU- Gjakova, vitin e kaluar i kanë bërë disa pastrime të pushtave. Për fund, të nderuar, e dijmë që kemi problem me lumin Rimmnik, e dimë që kemi problem ka Bërnjaka deri tek pika që është me e ulët, e dimë që kemi probleme tek muri te Shkolla e Mesme “Xhelal Hajda – Toni”, e dijmë që shtrati i lumit Dullo është duke u mbushur çdo ditë me mbeturina, po ashtu e dimë që shumë qytetar ndoshta edhe nga mungesa e informatave i kanë përzier ujërat e zeza me ujërat e bardha. Ne kemi filluar të marrim masa, i kam ftuar në një takim të gjithë inxhinierët dhe arkitektët e Komunës së Rahovecit, jemi duke e bërë incizimin e gjendjes së pikave dhe pastaj ata do të na tregojnë se cila do të jetë detyrat projektuese në mënyrë që kompania ta hartojë projektin, dhe kjo është për ne një prioritet i lartë, për arsye se ne nuk jemi të gatshëm që për 10 minuta shi të na shkoj i gjithë mudi dëm. Ne idetë i kemi marrë dhe detyra projektuese pothuajse është qartësuar se çfarë projekti do të duhej të bënte kompania që ne kemi kontratë, por unë shumë shpejtë do të kërkoj edhe ndihmën e Ministrisë së Infrastrukturës dhe Planifikimit Hapësinor që ta mbështesë realizimin e një projekti maksimalisht do ta zgjidhë problemin e ujërave atmosferik në qytetin e Rahovecit. Pastaj kompensim të dëmeve nga Komuna vështirës që mundet të ketë edhe pse janë diku rreth 99,000.00 €, por ne si komunë as 20,000.00 € nuk po kemi mundësi me i kompensu dëmet, ne do të kërkojmë ndihmë nga Qeveria Qendrore. Ne së bashku me dy apo tre komuna i kemi kërkuar Kryeministrit që me shumën prej 400 – 500 mijë euro të i ndajë dhe të na ndihmojë pasa vërshimeve të ditëve të fundit. I nderuari z. Munib Durguti, do të bisedoj me drejtorin z. Perparim Krasniqi ku do të shoh se si është situata e atij muri që ju e ceket, por, i nderuar, duhet të dini se disa kontrata ne i kemi trashëguar, nuk është që nuk mundemi të ndryshojmë diçka, por do të shikojmë pse është ajo situata ashtu, do të njoftohem pak më mirë.

E nderuar znj. Afërdita Thaqi, problemet që janë duke u shkaktuar shkaktuar brigjeve të lumit Drini i Bardhë, ku ditëve të fundit e patëm një rast tepër të rëndë në Kramovik. Ne jemi të gjithë të informuar se çfarë degradimi i skajshëm dhe i egër është duke ju bërë lumit Drini i Bardhë që nga Klina e deri tek Vërmica, ne e dimë që operatorët nuk e kanë eksploatuar rërën dhe zhavorin sipas kritereve, ne dimë po ashtu se Inspektorati nuk e ka kryer punën ashtu si duhet, të gjithë jemi dakord se vërejtjet janë serioze dhe me vend. Ne e kemi dërguar një projekt në IBG në Londër, pra kemi konkurruar në samitin e Londrës me projektin e shtratit lumi Drini, vlera e projektit është gati 100,000,000.00 €, ku do të përfshihet deri në fshatin Gjonaj. Ne nuk kemi ende ndonjë përgjigje direkte, pra jemi në pritje sepse ky projekt është një projekt shumë i madh, presim që një e ardhme e afërt mos do të na sjellë diçka pozitive.

E nderuara znj. Mirjeta Krasniqi sa i përket çështjes së bartjes së pronave, edhe objekti që ne jemi për momentin nuk ka pranim teknik, e di që është shumë keq që po e them, por realiteti është se ne jemi duke qëndruar në një objekt që nuk ka pranim teknik. Fatkeqësisht edhe ky objekt si objekt i ri nuk është i pranuar nga komisioni i pranimit teknik, po ashtu edhe për ato ndërtesa e di që janë disa probleme të cilat besoj se z. Qeska i di edhe si Avokat, por edhe si ish Kryetar Komune. Jam dakord që ne duhet ndoshta të bëjmë një përpjekje, ndoshta edhe si Kuvend që të krijojmë një farë baze më të shëndoshë, në mënyrë që institucionet e tjera të kenë pastaj më shumë respekt për vendimet e Kuvendit të Komunës. Nuk dua të hyj në detale por problem është edhe objekti që jemi ne edhe ato ndërtesa, po ashtu i kuptoj edhe ato shqetësimet e banorëve të kësaj ndërtese, më kujtohen këto shqetësime më kanë ardhur edhe në mandatin e parë që kam qenë Kryetar Komune. Sa i përket parkingut, operatori ka marr autorizim që të bëjë pastrimin e oborrit të ish Shkollës së Mesme, besoj se do të jetë i gatshëm së paku në “Muajin e mërgimtarëve” dhe do të jetë funksional. Po ashtu për “Muajin e mërgimtarëve” ne në oborrin e Komunës do ti lëmë disa vendparkime të rezervuara, e dijmë që nuk janë të mjaftueshme, por besoj se parkingu që e ceka më parë do të mjaftojë.

E nderuara znj. Shqipe Kryeziu, sa i përket objektit të Shkollës së Muzikës, z.Naser Dula është shumë entuziast, ka kërkuar që të ndërtohet shkolla në vendin e ish Shkollës së Mesme. E nderuar, është shumë problem të ndërtohet Shkolla e Muzikës në këtë vend, për arsye se ne shumë e vlerësojmë rendësinë e një objekti shumë të përshtatshëm me kushte të mira për Shkollën e Muzikës, por ky vend mundet të jetë me prioritet tjetër, kurse për momentin nuk kemi vend të përshtatshëm për ndërtimin e objektit të shkollës së muzikës. Tash shtrohet pyetje kur do ta bëjmë Shkollën e Muzikës dhe ku? Këtë pyetje edhe ne jemi duke ia bërë shumë shpesh vetës. Të nderuar edhe ne jemi shumë të interesuar që të kemi një objekt të Shkollës së Muzikës. Por siç e thash nuk kemi vend dhe nuk kemi parë sepse ndërtimi i një objekti të Shkollës së Muzikës është i kushtueshëm, nuk është sikurse ndërtimi shkollës në fshatin Kaznik.

Sa i përket ujit të pijes në fshatin Pastasel, e nderuara znj. Mirjeta Krasniqi, sipas një orientimi që na kanë dhënë ekspertët e KRU-Gjakovës, gypi i ujit i cili ka ardhur nga Guri i Kuq është në rregull, por ai ujëmbledhësi ose ai rezervoari që është atje nuk ka kapacitet të mjaftueshëm që ta furnizojë me ujë standard qytetarin e Pastaselit sepse rezervoari është i vogël. KRU – Gjakova na kanë sjellë një opsion tjetër i cili goxha shtrenjtë kushton, por sipas tyre këto gypa nuk janë më funksional. A është prioritet uji i pijes për fshatin Pastasel? Gjithsesi se është, unë personalisht i kam biseduar me KRU – Gjakovën, dhe i kam thënë a e keni analizuar mirë kur e keni bërë atë investim, pse e keni ndërtuar nëse është dashur të bëhen zgjidhje tjera, por sidoqoftë ne besoj se do të japim një zgjidhje këtij problemi.

I nderuari z. Vahid Krasniqi ne kemi kontrata me operator për rregullimin e kanalizimeve dhe rrugëve si në Drenoc, Senoc dhe plotë fshatra tjerë, po ashtu jemi të vetëdijshtë dhe besoj se edhe ju jeni të informuar që ne nuk i kemi të gjitha mjetet, ne nga pak po kemi disa probleme me operator. Disa operator thotë në rregull unë do e kryej punën kurse mjetet kur t'i ketë Komuna do mi paguaj, por ka operator që nuk punon pa ia lëshuar mjetet dhe aq sa ne ia lëshojmë mjetet aq edhe ata e kryejnë punën. Por për gjithçka që është e paraparë me kontratë do të kryhet, për atë të siguroj, ndërprerja ndodhë nga një herë sepse nuk ka mirëkuptim në kuptimin që të kryhen punët më shumë se sa ka mjete, ky është problemi, sepse nuk është jashtë vëmendjes as Drenoci dhe as Senoci si për kanalizim dhe rrugë ashtu edhe për pengesat në rrugë ose “policë të vdekur”.

I nderuari z. Fehmi Hoxha, sa i përket lojërave të fatit ato janë mbyllur jo me vendim të Qeverisë, por fillimisht me rezolutë të Kuvendit të Republikës së Kosovës. Ligji i vjetër është shfuqizuar, kurse në fuqi është ligji i ri i cili i suspendon aktivitetet e lojërave të fatit për një periudhë të caktuar. Sa i përket plotësimndryshimit të Rregullores për taksa, tarifa, ngarkesa dhe gjoba, i nderuar është duke u hartuar një rregullore e cila do të jetë model për gjithë Kosovën për të gjitha taksat që kanë të bëjnë me të gjitha kategoritë e bizneseve. Ju e dini se Kuvendi ka liruar bizneset prodhuese dhe disa biznese tjera, por disa biznese tjera që janë tregtare, janë ngarkuar me rregulloren e cila është ende në fuqi. Besoj se vjeshta do të na gjejë në një pozitë pak më të qartë sepse do të dimë ndoshta se si do të komunikojmë me Kuvendin e Komunës, ose se si

do të veprohet qoftë me plotësim-ndryshim të rregullores ekzistuese, qoftë me një rregullore që do të jetë standard për të gjitha Komunat e Republikës së Kosovës.

Lënda për eficiency e energjisë në katër shkollat e Komunës së Rahovecit ku në këtë rast pyetja ishte për shkollën në Drenoc, i nderuar, ka ndodhur një marifet atje në Agjension dhe ai marifet se po shprehem pak popullorçe, na ka detyruar që ti drejtohem me një shkresë Ministrit, Kryeshefit të Agjensionit dhe zyrtarit përgjegjës. Të nderuar siç duket ka një tendencë me lojë, me fonde dhe atë kushtimisht po e them, një projekt i Kamenicës ose Podujevës, se Rahoveci pret. I nderuar lënda është në agjensionin anti - korrupsion dhe besoj se dikush ka me u përgjigjigj për këtë vonesë.

Mirëmbajtja e ambienteve ose mjediseve të gjelbëruara si parqeve, rrugicave në përgjithësi hapësirave publike, mendoj se ka një përmirësim nëse e bëjmë një krahasim me të kaluarën, por megjithatë vazhdoj të jem i pakënaqur për arsye se ka mundësi të bëhet më mirë. Ka mundësi që të mirëmbahen edhe mjediset e gjelbëruara, varrezat civile edhe varrezat e martirëve, varrezat e dëshmorëve si dhe komplekset e dëshmorëve. Në mirëmbajtjen e hapësirave të gjelbëruara e kemi ndarë në Lot, pra nuk kemi dashur të ja japim një kompanie në kuptimin më pozitiv të fjalës, ka mundësi që një Lot ta ketë fituar ndonjë kompani që nuk mërzhitet fort, kurse ka ndonjë kompani që është më efikase. Në do ti vëmë edhe disa ambiente që nuk kanë qenë të përfshirë në mirëmbajtje, ato nuk kanë qenë të përfshirë në mirëmbajtje sepse kontrata nuk i ka përfshirë, përveç që do të futen në listë këto, ne ndoshta do të bëjmë edhe Lotin e katërt, ku ka mundësi që ti ndajmë me zona. Institucionet që unë sot i drejtoj jam i interesuar që ti kushtoj shumë më shumë vëmendje, dhe patjetër duhet t'i fusim në mirëmbajtje të gjitha rrugët dhe rrugicat publike, po ashtu edhe hapësirat e gjelbëruara që i ka Komuna jonë.

I nderuar Masar Popaj, objekti i vjetër i Komunës në mandatin tim të parë është bërë restaurimi dhe renovimi, por është e vërtet se ai objekt nuk ka mirëmbajtje të mjaftueshme, prandaj është mirë që ne të marrim masa kundër vetvetes ndonjëherë sepse ndonjëherë edhe vetë jemi të pakujdesshëm. Kur kam ardhur herën e parë në Komunë si Kryetar e kam gjetur derën e Arkivit të hapur, gjithmonë ashtu rrinte e hapur, çdo qytetar ka mundur të hyjë dhe t'i merr dokumentet e Komunës, kjo nuk guxon të ndodhë askund dhe asnjëherë. I bëjë thirrje Drejtorit të inspektoratit që të kujdeset për mirëmbajtje të ambientet në objektin e vjetër, dhe nëse është e nevojshme le ti ndëshkoj punëtorët ose le ta mbyllë, sepse nuk kemi dëshirë ne të na sëmuret ndonjë punonjësi ose ndonjë qytetar që vjen për të kryer punë.

Vjosa Isma – Përsëritet për të gjithë të pranishmit, kamë një pyetje rreth një konkursi që është shpallur në QPS, konkursin e keni shpallur për drejtimin Ekonomi, Juridik dhe Psikologji, kurse nuk e keni futur si kriter edhe drejtimin përkatës për Punë Sociale, edhe pse ka kandidat që e kanë të kryer këtë drejtim. Pse është shpallur konkursi në kundërshtim me udhëzimin administrativ, nëse kandidatët që janë përkatës për këtë drejtim nuk kanë mundësi të pranohen këtu atëherë ku do të pranohen?

Kryetari – E nderuar shërbimi i Personelit të Komunës së Rahovecit e ka një katalog që bazohet për hapje të konkurseve, dhe ekskluziviteti i kësaj çështje dhe çështjeve si kjo i takon vetëm Shërbimit të Personelit.

Vjosa Isma – I nderuari kryetar, kandidatja kur ka shkuar në Zyrën e Personelit në Komunë, me e pyet pse nuk e ka futur si kriter në konkurs edhe drejtimin për Punë Sociale? Përgjigja e zyrtarit të personelit ka qenë se nuk e kemi ditur që ka kandidatë të diplomuar me drejtimin për Punë Sociale. E juaja nuk është që të dini a ka kandidat, e juaja është që ta shpallni konkursin ashtu siç e përcakton Udhëzimi Administrativ, a ka kandidat apo jo atëherë ajo do të shihet në aplikim.

Kryetari – Edhe një herë e nderuar, siç e thash ne e kemi një Zyrë të Personelit, një Zyrë Ligjore, ata do ju japin informata deri në detaje, kompetencat janë të ndara, ne ju kuptojmë shqetësimi ndoshta është me vend, por unë nuk e di se si shkojnë këto punë dhe as që merrem me këtë punë sepse nuk është detyrë e imja.

Afërdita Thaqi – Më vie shumë mirë që paska filluar Kryetari të merret seriozisht me projektin për lumin Drini i Bardhë, i nderuar, a ka mundësi që së paku një rrugë të hapni deri tek Drini deri sa të filloj ai projekt, sepse nuk ka dalje andej?

Kryesuesi – Të nderuar kuvendarë, ju faleminderit për pyetjet e parashtruara, po ashtu falënderoj Kryetarin e Komunës, për përgjigjet e dhëna. Kalojmë në pikën e radhës:

3. Informatë e Raportit Financiar vjetor të Komunës së Rahovecit për vitin 2018 e Auditorit Kombëtar.

Afrim Limani – Drejtori Limani përshëndeti të gjithë të pranishmit në sallë, ku iu prezantoi informatën e Auditorit të Përgjithshëm në pika të shkurta anëtarëve të Kuvendit, ku ceku se pasqyrat financiare të Komunës së Rahovecit për vitin 2018 janë kualifikuar si pozitive. Dhe me këtë drejtori Limani tha se Komuna e Rahovecit ka krijuar mundësinë që të thithë grande si nga Qeveria e Republikës së Kosovës ashtu edhe nga ndonjë donator i jashtëm, po ashtu kjo është një imazh i mirë për Komunën e Rahovecit. Po ashtu drejtori Limani tha se plotësisht pajtohet me rekomandimet e auditorit të jashtëm që i ka dhënë për vitin 2018, ku shpreson se shumica e rekomandimeve do të përmirësohen.

Masar Popaj – Kam dy pyetje për drejtorin z. Limani, pyetje e parë është: I nderuar është viti i dytë me radhë që auditori gjen keq-klasifikime, dhe ky keq-klasifikim është duke ndikuar negativisht edhe në opinion, a keni marrë veprime të duhura që këto keq-klasifikime të mos përsëriten. Pastaj pyetja e dytë i nderuari drejtor, sa kanë vënë re në këtë raport auditori i ka dhënë 21 rekomandime, ajo që mua më intereson është a keni marrë veprimet e duhura për zbatimin e këtyre rekomandimeve?

Fahrije Lushi Morina – Përshëndetje për të gjithë të pranishmit! Ne në mbledhje të KPF-së i kemi diskutuar shumë çështje, prandaj sot do i përsëris vetëm disa nga ato. Tek paga dhe mëditje thuhet se ka mangësi në menaxhimin e personelit, këtu bëhet fjalë për 19 zyrtarë të angazhuar nga Drejtoria për Emergjencë dhe Siguri, pra Komuna nuk ka qenë në gjendje të ofroj dosje të kompletuar për këta punonjës civil. Kjo e gjetur e auditorit konsiderohet si jo e rregullt sepse është bërë në kundërshtim me ligjin për nëpunësit civil, po ashtu këta punonjës janë të angazhuar nga kjo Ministri, kurse pagat dhe kompensimet i marrin nga Komuna. Pastaj tek çështja C2 tek dosjet e pa azhurnuara të personelit, kjo lidhet drejtpërsëdrejti me Drejtorinë e Arsimit, ku thuhet se nga të gjeturat e auditorit tek dosjet e pa azhurnuara të personelit, janë analizuar 21 mostra, ku 9 prej tyre janë gjetur në DKA, kurse 2 në DSHPS, këtu mungon dëshmia e përvojës së punës dhe nuk kishte ndonjë pasqyrë të një vendimi të vërtetuar nga zyrtarët e autorizuar. Pastaj tek çështja A4 ceket parregullsi në angazhimin e stafit për shërbime të veçanta, e kam përmendur edhe në mbledhje të KPF-së, janë 9 punonjës të cilët që nga fillimi kanë marrë kontratë me bazë jo ligjore, sepse thuhet se duhet të jetë një afat kohor që Komuna duhet t'i angazhojë këta nëpunës për shërbime të veçanta në një afat më të shkurtër se 6 muaj, kurse Komuna ka angazhuar këta persona në një afat prej 120 ditësh, dhe është dashur të keni parasysh se kjo është në kundërshtim me ligjin. Tek çështja A5 mangësi në procesin e pagesave sipas marrëveshjes së bashkëfinancimit, në të dy raste pagesat për shërbimet kontraktuese në vlerën prej 20,000.00 €, ku thuhet se Komuna ka bërë pagesë për të cilët nuk ka ofruar dëshmi se janë kryer nga Komuna.

Fehmi Cena – Të nderuar, është një raport gjithëpërfshirës, duke marr parasysh që është bërë nga ZKA-ja, për ne është një raport shumë i besueshëm, pasi që ata janë më neutral dhe më profesional. Sipas meje ky raport i ka përfshirë tre hallkat kryesore, pasqyrat financiare vjetore, menaxhimi financiar dhe i kontrollit dhe zbatimi i rekomandimeve. Në fakt ZKA-ja raportin e ka kualifikuar me opinion të pa modifikuar me theksim të çështjes, por kur ne e lexojmë përmbajtjen, e shohim se në esencë janë duke dalë shumë të gjetura të parregullta, ku rezultojnë në fund me mbi 20 rekomandime, disa nga ta janë duke u përsëritur vit pas viti. Tek theksimi i çështjes e përmendi edhe drejtori dhe e dha arsyetimin se është bërë një mos harmonizim i vlerës p.sh. ceket tek tatimi në pronë 53,515.00 €, që nuk përputhet me saldo përfundimtare me atë fillestare, pastaj është vlera prej 133,918.00 € nga obligimet e papaguara nga viti i 2017 që nuk janë përfshirë si obligime të pa paguara dhe janë paguar nga buxheti i vitit 2018, këto ose janë bërë lëshime të pa qëllimshme ose të qëllimshme, do të presim një përgjigje nga drejtori për këtë. Pastaj shpenzimet prej 138,982.00 €, janë si keq-klasifikim, ku një pjesë e tyre kanë bërë kalim nga një kod në kodin tjetër, sikurse që është rasti me shumën prej mbi 113,000.00 € që janë marrë nga investimet kapitale dhe janë shfrytëzuar për paga dhe mëditje dhe mallra dhe shërbime. Pastaj ceket një shumë prej 24,526.00 €, që janë marr nga

mallrat dhe shërbimet dhe janë shpenzuar për paga dhe mëditje si dhe për subvencione, kjo është diçka që nuk është dashur të ndodhte, sepse ne kur e aprovojmë buxhetin Komunal nuk duhet të ndryshohen më pastaj kodet. Çështja tjetër është gjithashtu edhe obligimet që Komuna i ka paguar diku në vlerën prej mbi 105,000.00 €, përmes vendimeve gjyqësore, pse këto vendime të paguhen përmes vendimeve gjyqësore, kur janë mekanizmat komunal që duhet të i paguajnë. Tek detyrimet kontingjente ceket se ka pasur rritje të vazhdueshme, ku shuma e përgjithshme ka arritur dikur rreth 32 milion euro, kurse për vitin 2018 është rritur edhe për 690,000.00 €, po ashtu kjo ka tendencë që vazhdimisht të rritet, kërkoj një sqarim për këtë nga drejtori, dhe të në tregoj se pse ka rritje të vazhdueshme. Tek menaxhimi financiar dhe kontrolli, planifikimi dhe realizimi i buxhetit, gjithashtu shihet se shpenzimet fondeve që i ka pasur Komuna në dispozicion, në raport me burimet e fondeve që është dashur t'i shfrytëzoj nuk është e kënaqshme. Përmenden shifrat për vitin 2018, ku thuhet se Komuna ka shpenzuar 91.5% të fondeve që i ka pasur në dispozicion, pastaj në tabelën që e kemi të cekur shpenzimet fondeve sipas kategorive ekonomike, na del se niveli i realizimit 91.5% më tepër është e kapshme për paga ku janë shfrytëzuar 99%, pastaj shërbimet komunale 99%, kurse ajo që ne e vlerësojmë më tepër që do të duhej e shpenzuar p.sh mallrat dhe shërbime janë shpenzuar vetëm 62%, kurse për investime kapitale vetëm 55%. Kemi një pasqyrë financiare dhe shpenzimet buxhetore janë jo të kënaqshme, kurse ne e dimë se këto dy momente si pasqyrat financiare dhe shpenzimet buxhetore janë dy indikator shumë të rëndësishëm pas të cilëve bohet edhe vlerësimi i performacës së Komunës, madje edhe për thithjen e donacioneve qofshin ato vendore ose të jashtme. Për fund tek realizimi i këtyre rekomandimeve po del se për vitin 2018 nga 7 rekomandime që nuk janë zbatuar mbeten që të zbatohen, kurse gjithsej për vitin 2019 janë gjithsej 21 rekomandime, dhe në mesin e tyre ka mjaftë që përsëriten dhe flasin për një performancë jo mjaftë të mirë të Qeverisjes Lokale, dhe ne do të donim që kjo të mos përsëritet. Ka edhe shumë çështje të tjera që i ka përfshirë ZKA-ja në këtë raport, por besoj se edhe kuvendarët tjerë do të marrin fjalën ku do të diskutojnë sa i përket këtij raporti.

Dervish Çadraku – Me vëmendje e dëgjova drejtorin, dhe sipas tij po del që ne jemi shumë të kënaqur dhe puna është duke ecur shumë mirë në Komunë, por siç po shihet auditor i jashtëm nuk na i ka sjellë këto parashikime që na i tha edhe drejtori. Ne e dimë që Auditimi i brendshëm është një lloj përshkrimi i gjendjes faktike të një veprimtarie ekonomike në bazë të së cilës, menaxheri merr veprimet e nevojshme për stabilitet financiar. Nëse shkojmë kështu atëherë rekomandimet që i kemi nga auditori i brendshëm na del që menaxhmenti i Komunës nuk i ka përfillë aq sa duhet, sepse i kemi rreth 57 raste që i ka gjetur Auditimi i jashtëm, dhe nga ta 32 raste janë të zbatuara, kurse edhe 25 raste thuhet se janë në proces, por në fakt ato me siguri nuk janë në procedurë të përmirësimit të veprimeve të paligjshme. Në bazë të këtij Auditimi unë i nxjerr dy përfundime, e para: Pse menaxhmenti i Komunës nuk i përfill rekomandimet e auditorit të brendshëm, ai është një mbrojtës i keqmenaxhimit dhe keqpërdorimit të menaxhmentit të Komunës, kurse në fakt ata nuk e kanë përfillur, pastaj plot gabime ose plot vërejtje ka të cilat Komunën po e përcjellin kohë pas kohe dhe nuk po mundet assesi që këto gabime t'i përmirësoj. Në radhë të parë ne në bazë të këtij auditori kemi një performancë të dobët, sepse nga buxheti final i kemi rreth 14,284,134.00 € ku janë shpenzuar rreth 89% e këtij buxheti. Por nëse i heqim borxhet e viteve të kaluara që janë me vlerën prej 1,681,513.00 €, na del që nga këto, vetëm 2,761,000.00 € janë përdorur këtë vit, pra në bazë të përqindjes për vitin 2018 na del që na mbesin 55% të shpenzimit të buxhetit. Edhe më keq është kur e kemi parasysh që, prej 86 kontratave, 42 janë lëshuar në muajt e fundit të vitit 2018, ku na del që nga 7,102,009.00 €, janë lënë për fundvit, që do të thotë se janë 4,157,938.00 €. Po ashtu kemi vërejtje edhe tek mallrat dhe shërbimet, këtu sipas auditorit buxheti është realizuar rreth 62%, ju mund të thoni se kjo ka ndodhur sepse po keni probleme me grumbullimin e mbeturinave, por kjo tregon se kemi një menaxhim jo të mirë të buxhetit sepse 42% të tij janë realizuar në 4 muajt e fundit. Përveç këtyre vërejtjeve ne do të kemi këtu edhe legalizimin e objekteve që janë planifikuar rreth 45,000.00 €, kurse janë grumbulluar zero euro të hyra, kjo është një e metë e madhe e menaxhmentit të Komunës. Pastaj kemi gabim në kalkulimin e tatimit në pronë, në disa raste këtu ka nënvlerësim, diku kemi rreth 1,057.00 €, nëse shkohet kështu atëherë qytetarët do ta humbin besimin dhe nuk kjo do të ndikojë dobët në inkasim të mjeteve. Po ashtu si në të kaluarën edhe tani

janë duke vazhduar dobësitë në inkasim të qirasë, ku i kemi të painkasuar rreth 48,283.00 €, këto janë në 5 raste, pastaj në ushtrimin e veprimtarisë i kemi rreth 10 raste me 35,812.00 €. E theksoi znj. Fahrije Lushi se ne kemi probleme edhe tek emergjenca, kjo është një praktikë që ka vazhduar edhe në të kaluarën dhe është duke vazhduar edhe tani, dhe për këtë punëtorët e Drejtorisë së Emergjencës duhet të definojnë se a do të paguhet nga buxheti i Komunës apo nga buxheti i Ministrisë së Brendshme, sepse përpos pagave që i marrin e kanë edhe një shtesë prej 30.00 € ku në total na del rreth 7,488.00 € i merret buxhetit të Komunës. Dobësi ka edhe në Shëndetësi si dhe në Arsim, këto të dyja i përcjellin disa gabime ku si pasojë e këtyre pastaj ka pasojë në buxhet në performancë, prandaj mendoj se një herë e mirë duhet të mërimi me këto punë dhe të rregullohen këto probleme një herë e mirë, në mënyrë që mos të kemi më probleme. Ne këto drejtori kemi mungesë të dosjeve, drejtori e ka për detyrë që ti plotësojë dosjet, të cilat, pastaj përmes tyre paguhet performanca. Nëse i shikojmë investimet kapitale po ashtu edhe këtu do të shohim se ka shkelje të ligjeve, zyra e prokurimit me veprimet e saja përcjellëse gjithmonë ka pasur dhe do të vazhdojë të ketë shkelje të ligjit, ka pagesa pa raport të pranimi, pastaj ka vazhdim të punimeve, pas afatit të kontratave, pas një marrëveshje të re ato janë paguar me shumën rreth 90,000.00 €, punohet përtej paramasës dhe llogarisë, pra pa aneks-kontratë, pastaj lidhen kontratat pa zotim të mjeteve, ka parallogaritje të gabuara të kontratave. Këtu unë mund të dyshoj se komisioni kur e bënë parallogaritjen, atë që e favorizon kinse nuk e ka llogarit mirë dhe ai pastaj del i pari me çmim dhe në listë, kurse të tjerët dalin nga kombinimi. Pastaj këtu ceket se punohet edhe pa projekt, Komuna ka paguar rreth 105,933.00 € me Përmbarues, dhe ndër të tjera Komuna ka humbur rreth 360.000 €, pse kjo duhet të ndodhë kështu. Pastaj thuhet se vazhdon mos regjistrimi i saktë i pasurisë financiare, ku ceket se në QKMF janë rreth 3000 litra që nuk i dinë se ku janë, kjo është shkelje ligji dhe për këtë dikush duhet të ndëshkohet. Pastaj nuk mbushen formularët e udhëtimit dhe destinacionet, atëherë unë mundem të dyshoj se ata ka mundësi që të shkojnë dhe të kryejnë punët e veta personale, në dasma apo diku tjetër. Duke i parë disa qytetar si duket edhe Komuna ka filluar të jetë e pa përgjegjshme, sepse i kemi diku rreth 57 raste të faturave të pa paguara, që do të thotë se janë diku rreth 1,716,604.00 €, me ligj jemi të obliguar që këtë shumë brenda 30 ditëve të paguajmë, nëse nuk i paguan atëherë menjëherë fillojnë sanksionet. Të gjitha këto që i thash janë disa nga vërejtjet e auditorit të jashtëm, ku në shumicën e rasteve i ka shprehur edhe auditori i brendshëm, këtu po shihet se ka zhagjitje nga ana e drejtorëve për shqyrtimin e rekomandimeve, prandaj, vazhdojnë të paraqiten vazhdimisht dobësitë. Kur Komuna e ka një plan të veprimit për zbatimin e rekomandimeve të auditorit, mendoj se ai duhet të funksionoj sepse me moszbatimin e rekomandimeve dëmtohet buxheti i Komunës dhe i taksapaguesve, pastaj dobësitë vazhdojnë të përsëriten kohë pas kohe.

Ali Zhuniqi – Meqenëse u cekën shumica e atyre që kam dashur t'i diskutoj nga z. Dervish Çadraku, por mendoj se kishte me qenë mirë që të jetë prezent Kryetari i Komunës kur diskutohet një raport i Auditimit të Jashtëm 1 vjeçar. Pyetje ime është: Pse të gjitha këto probleme të cilat janë raportuar nga ana e Auditimit Kombëtar ku janë vërejtur disa probleme dhe shkelje ligjore, si në vonesa në arkëtimin e pagesave pas skadimit të kontratës në projektet e caktuara, nënshkrim të kontratës pa zotim të mjeteve të mjaftueshme, menaxhim jo adekuat i autoparkut ose furnizim me karburant i veturave zyrtare nga personeli në Drejtorinë e Administratës, DKA-së dhe QKMF-së, pra formularët nuk janë nënshkruar nga ana e zyrtarit kompetent. Pagesat sipas vendimeve gjyqësore në favor të operatorëve, ku kanë rezultuar me shpenzime shtesë për Komunën në shumën prej 4,366.00 €, pra në dëme të Komunës, funksionim jo efikas i NJAB-it, ku përfshihen mos dokumentimi i fakteve dhe dëshmime të nevojshme të cilat e dëmtojnë efektivitetin e punës së NJAB-it, pastaj dobësinë e kontrolleve menaxheriale dhe menaxhimi i rrezikut të gjithë sistemeve financiare, flas gjithmonë duke ju referuar raporteve të Zyrës së Auditimit Kombëtar. Në mbledhjen e kaluar i kam bërë pyetje Kryetarit dhe mendoj se kishte me qenë mirë që të jetë edhe sot këtu ku përsëri ja kisha bërë pyetjen, pse nuk na vijnë raportet në baza 6 mujore nga drejtoritë përkatëse? Mendoj se raportimi në baza 6 mujore të drejtorive përkatëse do ta rriste efikasitetin e punës së drejtorive të caktuara, dhe në raport me llogaridhënien e drejtorive përkatëse, sot, sigurisht se do të kishim një raport më të mirë të Auditimit

Kombëtar. I rekomandoj Nënkyetarit që t'ia përcjellë Kryetarit të Komunës, që do ishte mirë që drejtorët e të gjitha fushave të na sjellin neve në Kuvend raporte në baza 6 mujore.

Qazim Qeska – Përshëndetje për të gjithë të pranishmit! E kam marrë fjalën me qëllim që të kontribuojë në diskursin tim, por duke marrë parasysh që shumica nga kolegët e mi e kanë dhënë kontributin e vetë të çmuar në shqyrtimin e raportit të Auditorit të Brendshëm. Me bindje të plotë e them të nderuar, se diskutimi im i mëtutjeshëm nuk do të ishte më kontributdhënës, andaj unë tërhiqem nga diskutimi im.

Ali Morina – Përshëndetje për të gjithë të pranishmit! Meqenëse të gjitha çështjet u përmenden nga parafolësit edhe unë nuk do të lëshohem shumë në diskutime, por, kisha kërkuar nga Kryetari i Komunës dhe nga drejtorët e drejtorive që të merren parasysh rekomandimet e Auditorit të Përgjithshëm, dhe të mos përsëriten nga viti në vit. Konsideroj se janë rekomandime lehtë të arritura, me një qasje pak më serioze besoj se të gjitha do të realizohen, po ashtu besoj se në vitin e ardhshëm do të del një raport edhe më i mirë edhe pse edhe këtë vit nuk është se ka dalë keq.

Afërdita Thaqi – Unë kam një pyetje konkrete për drejtorin e Financave. I nderuar, a janë rritur rekomandimet apo janë ulur nga viti 2017 në vitin 2018, nëse janë rritur në vitin 2018, pyetja ime është: Pse ka dalë raporti mirë, kurse nëse në vitin 2017 ka pasur më pak rekomandime pse ka dal keq raporti?

Rukije Krasniqi – Përshëndetje për të gjithë të pranishmit! Raporti financiar ka rezultuar pozitiv nga Auditori Kombëtar, dua të besoj vet këtij raporti por edhe fjalës së drejtorit, sepse është njeri kompetent dhe ekspert i kësaj fushe. Një punë e mundimshme dhe me përkushtim dhe me një menaxhim i drejtë i financave sjellë përparim progres, por, parregullsitë eventuale të vogla të cilat ishin në dukje, mendoj se me një punë dhe angazhim të shtuar ato parregullsi do të menaxhohen. Nuk pash diçka që u diskutua nga parafolësit që ceken ndonjë shkelje të rëndë, kjo e tregon edhe performanca të cilën e kemi fituar, ku në nivel vendi ishim ndër Komunitet me një performancë më të mirë, dhe kjo tregon se rezultatet pozitive duhet të i adresohen vetë Kryetarit dhe qeverisë së tij që e bëjnë një punë të mrekullueshme gjatë këtij mandati.

Isak Hoti – Të nderuar, me drejtorin u dakordua që vetëm për çështjet e kontratave për shërbime të veçanta të dalë unë t'u jap përgjigje, pastaj pjesën tjetër do të del drejtori. Të nderuar i kemi dy kategori të punësimit, tek neni 12 pika 4 tek kontratat për shërbime të veçanta, realisht për këto 9 kontrata që flitet, sugjerimet nga Zyra Ligjore kanë qenë që të ndiqet procedura sipas ligjit për shërbimin civil, këto janë kontrata që lidhen deri në 6 muaj, ke mundësi edhe më pak se 6 muaj. Të nderuar, kur i kanë shtypur kontratat Zyra e Personelit i ka shtypur gabimisht sepse ata janë bazuar në ligjin e punës, kjo është krejt një gabim teknik. Tek ligji i punës ceken kontratat për punë dhe detyrë specifike, maksimumi është 120 ditë, që i bie 4 muaj e jo 6 muaj, pra gabimi ka qenë vetëm tek këto 9 kontrata, të nderuar, as këto kontrata nuk janë lidhur pa konkurs, pra pa transparencë, pra ky është sqarimi im rreth këtyre kontratave.

Afrim Limani – Ju faleminderit për pyetjet e parashtruara – të nderuar disa pyetje janë parashtruar të njëjta, prandaj gjatë përgjigjeve që do bëj për njërin besoj se do të kuptoni që edhe ju e keni marr atë përgjigje. I nderuari z. Masar Popaj, është shumë e vërtetë që kemi keq-klasifikim, por keq-klasifikimi i vitit të kaluar ka qenë me një masë pak më të madhe, dhe kriteri kryesor ka qenë që pasqyrat financiare janë dalë negative. e thash në fillim se ka qenë një limit që unë nuk e kam ditur, por gjatë vitit 2018 e kam mësuar që qenka ai limit, pra nëse vlera arrin diku mbi 150,000.00 €, atëherë automatikisht pasqyrat dalin me opinion të keq. Pastaj ishte një pyetje se a kemi ndërmarrë veprimet e duhura për zbatimin e këtyre rekomandimeve? Të nderuar, ne e kemi mbajtur një takim në kuadër të Ministrisë së Financave, ku ka dalë një udhëzim i ri administrativ, ku thotë se duhet të formohet një komision, ku pastaj çdo tre muaj duhet të shikohet se ku kanë ecur rekomandimet, sa janë zbatuar sa nuk janë zbatuar.

E nderuara znj. Fahrije Lushi, është shumë e vërtetë që dosjet e personelit i ka Ministria e Punëve të Brendshme, pagat paguhen nga buxheti i Komunës, ky nuk është problem vetëm i Komunës sonë, ky problem është në nivel të Kosovës. Ne kemi mbajtur disa takime dhe nga viti i ardhshëm menaxhimi i zjarrfikësve do të kalojë në kuadër të Ministrisë së Brendshme, po ashtu edhe punëtorët e pylltarisë dhe inspektorët e tregut. Është e vërtetë që kanë munguar disa dosje në kuadër të Drejtorisë për Arsim.

I nderuari z. Fehmi Cena i bëri disa pyetje dhe disa shqetësime. I nderuar, besoj se në fillim unë ju dhashë sqarime kur ju thash se janë tre çështje kryesore që i ka gjetur auditori, të gjeturën e parë e arsyetove me mos-harmonizim të llogarive të arkëtueshme të tatimit në pronë, pastaj çështja e dytë ishte tek obligimet e borxheve apo obligimet të cilat i kemi bartë, rastësisht na ka ikur kjo shumë dhe nuk e kemi vërejtur, por auditori e ka vërejtur. Kurse, sa i përket keq-klasifikimit kjo ka dal si rezultat i planifikimit të buxhetit për mallra dhe shërbime e cila ka qenë sasia e buxhetit e limituar, pastaj jemi detyruar që këtë kontratë ose këto shpenzime t'i fusim në kuadër të investimeve kapitale, dhe detyrimisht ne nuk kemi mundur t'i ikim kësaj. Sa i përket obligimeve gjyqësore është e vërtetë sepse ne kemi lëndë që kanë ardhur para 10 viteve për ekzekutim dhe ne nuk kemi pasur njohuri fare, por nga ana juridike operatori ka pasur të drejtë dhe e ka fituar lëndën. Është interesante se kur vie puna tek ekzekutimi, përmbaruesi dhe thesari nuk pyesin ku t'i marrin mjetet, por, ata ku i gjejnë aty edhe i marrin. Sa i përket detyrimeve kontingjente, në vitin 2017/2018 ne në një periudhë ne si Komunë nuk kemi pasur Avokat të Komunës, dhe neve na ka munguar një raport i tillë, kurse në fillim të vitit 2018 ne kemi pasur Avokat të Komunës dhe pastaj në fund të vitit 2018 është dorëzuar raporti që i ka bartur edhe këto borxhe, pra, detyrimet kontingjente nga viti 2017. Sa i përket shpenzimit të buxhetit në masë të vogël, të nderuar, e kam cekur edhe në KPF, se ne raportin financiar vjetor kur e kemi dorëzuar, i kemi marr parametrat e buxhetit fillestar dhe buxhetit përfundimtar, pra, sa ka qenë buxheti i planifikuar e kemi llogaritur në përqindje. Ju të nderuar, në faqe nr. 12 keni mundësi të shihni më mirë, auditori e merr për bazë buxhetin përfundimtar, ne gjatë vitit fiskal 2018, kemi pasur prurje buxhetore në vlerë prej 585,000.00 €, nëse e krahasojmë në përqindje raportin e buxhetit përfundimtar në raport me buxhetin fillestar atëherë 96,7% që e kemi shpenzuar buxhetin, nëse i fusim edhe këto pronat e tjera atëherë realizimi i buxhetit përfundimtar me realizim të buxhetit dele diku 91%. Pyetje tjetër ishte, pse kaq pak shpenzim të buxhetit në kategorinë e mallrave dhe shërbimeve. Ne e kemi diskutuar edhe në takime tjera sepse pikërisht është pjesa e pamundur vetanake të cilën nuk kemi pasur mundësi ta realizojmë, diku planifikimi i të hyrave vetanake ka qenë 1,650,000.00 €, kurse ne i kemi realizuar vetëm 1,160,000.00 €, pikërisht kjo diferencë e paraqet përqindjen e mos realizimit të buxhetit.

I nderuari z. Dervish Çadraku, auditori nuk e shkruan punën e mirë, auditori i gjen dhe i raporton vetëm gjërat negative, ky është dallimi, sikur të kishte shkruar edhe punët e mira që janë bërë, atëherë mendoj se kishim pas me dal shumë më mirë, megjithëse unë pajtohem me të gjitha ato që janë thënë, por të gjitha këto të gjetura janë të vogla, me një angazhim pak më serioz ne do t'i kryejmë edhe këto. Sa i përket pyetjes për investime kapitale, realizimi i buxhetit për investime kapitale ka shkuar në masën prej 98%, por me prurjet që janë ardhur thuaja 100% është shpenzuar, auditori këtu e ka shmangur pjesën e obligimeve që i kemi bartur nga viti 2017, kurse e ka cekur se ne e kemi paguar vetëm për pjesën e borxheve. E falënderoj z. Ali Zhuniqi për sugjerimet dhe vërejtjet e dhëna, po ashtu edhe z. Ali Morinën.

E nderuar znj. Afërdita Thaqi, në vitin 2017 i kemi pasur 13 rekomandime, kurse në vitin 2018 i kemi 21 rekomandime, e nderuar numri i rekomandimeve nuk qon peshë, peshë qon se çfarë rekomandime ju janë dhënë. P.sh pe marrim regjistrimin e pasurisë ose aseteve Komunale, vazhdimisht Komuna e Rahovecit e ka pasur këtë problem, ky rekomandim qon shumë peshë, ne këtë pikë e kemi përmbush dhe më nuk kemi rekomandim për këtë, ky rekomandim është sa 10 rekomandime tjera që na janë dhënë këtë vit. E falënderoj znj. Rukije Krasniqi për lëvdatat, por mendoj se nuk kam nevojë për aso epitete, nuk jam ekspert por mundohem që ta kryej punën sa më mirë që mundem.

Ali Zhuniqi – Te çështja e angazhimit të stafit për shërbime të veçanta, konkretisht thuhet: Është lidhur marrëveshja me shërbimet e veçanta për 9 punonjës, pastaj thotë: Komuna fillimisht kishte përdorur bazën e gabuar ligjore, duke lidhë kontrata për punët e tyre specifike në kohëzgjatje prej 120 ditë sipas ligjit të punës. Pastaj pas përfundimit të këtyre kontratave Komuna ka vazhduar edhe për 6 muaj tjerë me marrëveshje për shërbime të veçanta me ligjin e shërbyesve civil. Një dukuri e tillë sipas jush është për arsye të interpretimit të gabuar të ligjit nga zyrtari i personelit, a ka të drejtë menjëherë pas 120 ditëve të vazhdohet kontrata me shërbime të veçanta, bazuar në shërbimin e ligjit civil? Nëse jo a është marrë hap

konkret nga ana e Kryetarit të Komunës për menaxherin e personelit, i cili e ka bërë këtë gabim ligjor, nëse jo, ne si LVV kërkojmë që të merren hapa konkret dhe ky menaxher i personelit të ndëshkohet.

Kryesuesi – I nderuar sa i përket pyetjes së raporteve të drejtorive, të gjitha i keni në web faqe të Komunës.

Isak Hoti – I nderuar z. Zhuniqi, kontratat për shërbime të veçanta janë të lejuar me ligj, a vie ky në pushtet apo dikush tjetër, kjo do të përcillet deri më 1 nëntor, pas kësaj date më nuk ka këso kontrata, por nuk do të thotë se nuk do të kemi zgjidhje për këso kontrata të ngjashme, sepse do të ketë ndonjë model tjetër. Sa i përket çështjeve ligjore të këtij ligji a ka të drejtë apo jo, bëhet një dallim, kontrata për punë dhe detyrë specifike është diçka tjetër, kjo nuk lidhet me kontrata për shërbime të veçanta që i përcakton krejt një ligj tjetër. Kurse sa i përket gabimit që e ka bërë shefi i personelit, ne për një gabim teknik nuk mundmi ta pushkatojmë njeriun, e ka pranuar gabimin dhe më nuk do të përsëritet më.

Kryesuesi – Ju faleminderit të gjithëve për diskutimin e bërë sa i përket pikës së tretë, kalojmë në pikën e radhës të rendit të ditës:

4. Shqyrtimi dhe aprovimi i Propozim-vendimit të Kryetarit të Komunës për këmbimin e pronës Komunale.

Afrim Oruçi – Përshëndetje për të gjithë të pranishmit! Të nderuar anëtar të Kuvendit, para jush propozoj vendimin e Kryetarit të Komunës në bazë të ligjit të Këmbimit të Pronës. Kjo pronë gjendet në zonën kadastrale në Rahovec, bëhet fjalë për 60 ari, pronë e cila është në shfrytëzim të Agjencionit Pyjor andaj propozoj para juve që të këmbejmë me pronë Komunale të Komunës së Rahovecit me të njëjtën sipërfaqe prej 60 ari e cila gjendet në zonën kadastrale në Koznik. Qëllimi i këmbimit të pronës Komunale me ekonomik e pyjeve është që të ndërtohet kulla e gurit për heronjtë e Kosovës, Selajdin Mullabazi-Mici dhe Xhelal Hjada-Toni si dhe për dëshmorët Bektesh Haliti, Nezir Ymeri dhe Hamdi Hajrizi. Ftoj kuvendarët që pas shqyrtimit të propozim-vendimit për këmbim të votojnë vendimin për këmbimin e pronës Komunale me pronë që është në shfrytëzim të Agjencionit Pyjor.

Kryesuesi – Të nderuar, nëse nuk keni askush të shtoni diçka sa i përket pikës së katërt të rendit të ditës, atëherë e vë në votim Propozim-vendimin e Kryetarit të Komunës për këmbimin e pronës Komunale: Konstatoj se në mënyrë unanime është aprovuar pika e katërt (4) e rendit të ditës. Kalojmë në pikën e radhës të rendit të ditës:

5. Shqyrtimi dhe aprovimi i Propozim-vendimit të Kryetarit të Komunës për dhënien e pronës në shfrytëzim afatshkurtër për raste të veçanta.

Afrim Oruçi – Të nderuar, me kënaqësi paraqes para jush me kërkesë të Kryetarit të Komunës, Propozim-vendimin për dhënien në shfrytëzim afatshkurtër të pronës Komunale në raste të veçanta, bëhet fjalë për Ushtrinë e Republikës së Kosovës e cila na është drejtuar me kërkesë dhe po kërkon prej neve në shfrytëzim afatshkurtër të përcaktuar me dhjetë (10) vite. Këto dy prona gjenden në zonën kadastrale në Rahovec ashtu siç e keni të paraqitur në projektor bëhet fjalë për prona shtetërore të Komunës së Rahovecit, njëra prej parcelave është prej 68 ari e 6 metra². Këto parcela gjenden mbi poligonin të cilin e ka pasur për një kohë të gjatë KFORI, ndërsa parcela tjetër është afër kësaj. Qëllimi i dhënies në shfrytëzim të pronës së paluajtshme të Komunës është ruajtja dhe ngritja e niveleve të trajnimeve dhe profesionalizmit të Batalionit-Brigadës për Reagime të Shpejta duke u bazuar në misionin e Ushtrisë së Republikës së Kosovës. Afati kohor i dhënies në shfrytëzim të kësaj prone është 10 vite andaj Komuna e Rahovecit do të kujdeset që të realizojë interesin publik. Ftoj kuvendarët që pas shqyrtimit të votojnë Propozim-vendimin e Kryetarit për dhënien në shfrytëzim të kësaj prone për dhjetë (10) vjet.

Fehmi Cena – Të nderuar, ne këto pikat i kemi shqyrtuar edhe në mbledhjen e KPF-së, këtu ka qenë dilema se shkruante në atë dokumentin se është pjesa që KFORI më herët e ka shfrytëzuar për manovra të veta, mirëpo është sqaruar nga drejtori që është një parcelë tjetër, ashtu që jemi dakorduar dhe mendoj që kjo duhet të kalojë.

Kryesuesi – Të nderuar nëse nuk kemi dikë tjetër të lajmëruar, atëherë e vë në votim Propozim-vendimin e Kryetarit të Komunës për dhënien e pronës në shfrytëzim afatshkurtër për raste të veçanta. Konstatohet se në mënyrë unanime është aprovuar pika e pestë (5) e rendit të ditës. Kalojmë në pikën e radhës të rendit të ditës:

6. Shqyrtimi dhe aprovimi i Propozim-vendimit të Kryetarit të Komunës për Shpalljen me interes të përgjithshëm pjesa e parcelës P-71510057-02240-1, në sipërfaqe prej 42099 m² në Rahovec.

Afrim Oruçi - Të nderuar kuvendar, para jush e keni vendimin për shpallje në interes të përgjithshëm të parcelës P7-15-10057-02240-1 në sipërfaqe prej 110 mijë m² në Rahovec. Kjo parcelë gjendet në zonën kadastrale në Rahovec, saktësisht përmbi dhe përfund rrugës transit që e lidh Rahovecin me Therandën dhe pjesët tjera. Qëllimi i shpalljes të kësaj sipërfaqe të parcelës, bëhet fjalë për 1 hektar e 10 ari, qëllimi i kësaj është të ruhet vlera e pronës Komunale, andaj ftoj kuvendarët pas shqyrtimit të propozimit të votojnë vendimin që të shpallet me interes të përgjithshëm.

Fehmi Hoxha – Të nderuar, propozoj që kjo pikë të tërhiqet menjëherë, pasi që jemi në kundërshtim me një vendim që Kuvendi Komunal, vendimmarrja e kaluar me datën 14.07.2016 e ka marr vendim për inicimin e procedurës për zgjerimin e zonës ndërtimore rreth rrugës transit në Rahovec. Komplet kjo është bërë me të vetmin qëllim që kjo parcelë të inkorporohet në kuadër të Planit Zhvillimor Komunal të Rahovecit, andaj nuk kemi të drejtë të shkojmë kur e kemi një vendim i cili është 113 hektar. Ju lus që kjo të mos të procedohet dhe të shtyhet edhe pas miratimit të PZHK -së të bëhet një parcializim prej anës së Qeverisë Komunale dhe më pas të fillohet procedura dhe të kërkohet nga Agjencioni Pyjor i Kosovës që t'i kthehet prona.

Afrim Oruçi - Falënderoj kuvendarin në fjalë lidhur me shqetësimin e tij personal lidhur me këtë propozim-vendim, sa për informatë dhe shpjegim për anëtarët e tjerë të Kuvendit bëhet fjalë për 1 hektar e 10 ari, është mirë që Kuvendi i Komunës në atë kohë ka marr një vendim për inkorporim të kësaj parcele për 113 hektar, sot bëhet fjalë për 1 hektar e 10 ari, ne po propozojmë ta shpallim këtë parcelë me interes të përgjithshëm. Ftoj edhe njëherë kuvendarët që të votojnë propozim-vendimin për shpallje me interes të përgjithshëm të kësaj sipërfaqe, se nuk besoj që bëjmë ndonjë shkelje ligjore se akoma nuk ka kaluar Plani Zhvillimor Komunal.

Rexhep Oruçi – Të nderuar anëtar të Kuvendit e mora fjalën sa për sqarime juridike, nëse e kemi një vendim në fuqi pa marrë parasysh sa hektarë është, atëherë duhet të korrigjohet vendimi paraprak, nëse njëherë është shpallë, ose duhet të bëhet plotësim- ndryshimi i vendimit përndryshe nuk ka kurrfarë kuptimi juridik.

Isak Hoti – Të nderuar, e para ne nuk e shkelim ligjin me këtë, vendimi që është nxjerr në 2016 është nxjerr vendim për zgjerimin e zonës ndërtimore, asgjë tjetër. Nuk bëjmë shkelje sepse realisht është bërë propozim deri në marrjen e vendimit të PZHK-ës, e cila është në përpunim e sipër (PZHK-ja), nuk ka përfunduar dhe nuk do të thotë që ne duhet t'i ndërprejmë procedurat.

Munib Durguti – Shefi i zyrës ligjore e dha sqarimin e nevojshëm, unë kisha propozuar që në kuadër të këtij vendimi patjetër të ceket vendimi i viti 2016, pra të mos kemi dy vendime paralele për një çështje, aty Kuvendi duhet me vendos natyrën për çka, mirëpo ne tash po kërkojmë me nda një hapësirë të vogël brenda asaj pronë.

Isak Hoti – Të nderuar, në këtë rast akoma nuk është fuqizuar ai vendim komplet se nuk është miratuar ende PZHK-ja.

Qazim Qeska – Të nderuar kuvendar, janë dy opinione këtu dhe nuk besoj që jemi kundër interesit të përgjithshëm shoqëror apo të Komunës por sidoqoftë Isaku dha një arsytim, ky vendim i vitit 2016 që është mos është ndesh me projektin që ju e planifikoni me këtë interes të përgjithshëm. Zona ndërtimore është shumë më me peshë se sa çdo projekt që është kundër zonës.

Sali Sallteku – Të nderuar anëtar të Kuvendit, ne biseduam deri tash për interes të përgjithshëm, andaj unë konsideroj së interes i përgjithshëm i të gjithë qytetarëve të Komunës së Rahovecit është që kjo pronë të shfrytëzohet për interes të qytetarëve të Komunës së Rahovecit.

Fehmi Cena – I nderuar drejtor, kjo parcela a është mbi rrugën transit apo nën transit? Sepse prezenca në këtë skicë nuk na e sqaron plotësisht, edhe pse në mbledhjen e KPF-ës kemi kërkuar që të prezantohet në ortofoto. Ndërsa po të pyetesh unë ndërtimet mbi rrugën transit nuk do të kisha lejuar. Po ashtu numrat që i keni cekur në vendim rreth kësaj parcele duhet të përmirësohen sepse nuk përputhen me atë që e propozuat dhe kjo që është në dokumentet të cilat i keni paraqitur. Po ashtu kjo pjesë-parcelë a do të jetë e përfshirë në PZHK apo jo?

Afrim Oruçi - Fillimisht më lidhje me sqarimin e ngritur nga z. Cena, bëhet fjalë për 70 ari mbi rrugën transit edhe për 40 ari tjera përfund rrugës transit, ne jemi veç fazën e parë sipas ligjit ndërsa pas kësaj faze ne prapë do të vijmë tek ju që të kërkojmë pëlqim për këmbim dhe nëse ju na e jepni pëlqimin për këmbim ne e bëjmë këtë pronë shtetërore të Kosovës. Ne po e bëjmë atë pjesë vetëm për 1 hektar e 10 ari në mënyrë që të vazhdoj procesi përpara, mirëpo ju jeni ata që vendosni.

Kryesuesi – Ju faleminderit të gjithëve për diskutimin e bërë, e vë në votim Propozim-vendimin e Kryetarit të komunës për Shpalljen me interes të përgjithshëm pjesa e parcelës P-71510057-02240-1, në sipërfaqe prej 42099 m² në Rahovec. Konstatohet se në mënyrë unanime është aprovuar pika e gjashtë (6) e rendit të ditës. Kalojmë në pikën e radhës të rendit të ditës:

7. Shqyrtimi dhe aprovimi i Propozim-vendimit të Kryetarit të komunës për Shpalljen me interes të përgjithshëm pjesa e parcelës P-71510057-02240-1, në sipërfaqe prej 42099 m² në Rahovec.

Afrim Oruçi - Të nderuar kuvendar para jush e keni vendimin për shpallje me interes të përgjithshëm të parcelës 2240P1, bëhet fjalë për sipërfaqe për zonë kadastrale në Rahovec, bëhet fjalë për 4 hektar e 20 ari e 99 m², tash jemi në mes të rrugës të Epopeja e UÇK-ës te maja e Shkodranit, qëllimi i kësaj parcele me interes të përgjithshëm është që po dëshirojmë me ruajt pjesën që është shumë afër majës së Shkodranit, andaj ftoj kuvendarët që të votojnë Propozim-vendimin për shpalljen me interes të përgjithshëm të sipërfaqes së 4 hektar 20 ari e 99m².

Kryesuesi – Nëse nuk ka askush të shtoj diçka sa i përket kësaj pika, e qes në votim Propozim-vendimin e Kryetarit të komunës për shpalljen me interes të përgjithshëm pjesa e parcelës P-71510057-02240-1, në sipërfaqe prej 42099 m² në Rahovec. Konstatohet se në mënyrë unanime është aprovuar pika e shtatë (7) e rendit të ditës. Kalojmë në pikën e radhës të rendit të ditës:

8. Informatë nga Drejtoria për Kulturë, Rini dhe Sport për objektet e trashëgimisë kulturore – historike të Komunës së Rahovecit.

Bjondina Kleqka – Përshëndetje për të gjithë të pranishmit, gjatë mbledhjeve të kaluara është kërkuar nga Drejtoria për Kulturë, Rini dhe Sport që të përgatitet një informatë lidhur me listën që e kemi ne si drejtori rreth objekteve të vjetra dhe trashëgimisë së Rahovecit. Në bazë të analizës që është bërë nga viti 2000 deri në vitin 2019, nga trashëgimia pakufi, është përpiluar kjo listë të cilën ju kemi dërguar në kopje fizike dhe është listuar në bazë të vjetërsisë së tyre. Disa nga objektet e trashëgimisë kulturore të përmendura në këtë listë janë rrënuar dhe ka mungesë të përpunimit të aseteve dhe për të ndryshuar listën ne do të formojmë një komision me njohës të kësaj fushe dhe listën me propozime t'ia dërgojmë Këshillit të formuar nga Ministria për Kulturë, Rini dhe Sport pasi që është në kompetencë të tyre për caktim të objekteve në listën e mbrojtjes nga shteti.

Fehmi Cena - Fillimisht e falënderoj Drejtoreshën për këtë informatë të cilën e kemi kërkuar në mbledhjet e kaluar, ne e kemi ngritur këtë çështje për arsye se Rahoveci si qytet ka objekte të trashëgimisë kulturore dhe historike. Kjo listë mendoj që është hapi i parë në këtë drejtim edhe pse këtu ka objekte edhe pse janë në listë mirëpo kështu nuk ekzistojnë si objekte. Prandaj duhet të përpilohet një listë me objekte të vërteta që ekzistojnë. Kishte me qenë mirë që në mbledhjen e ardhshme Drejtoresha të del me propozim për formimin e komisionit.

Ali Zhuniqi – Të nderuar, ajo që mua më intereson më së shumti është: a i keni identifikuar të gjitha objektet e trashëgimisë kulturore që janë në Komunën e Rahovecit apo ende jeni në procedurë duke pritur formimin e komisionit?

Kryesuesi – Nëse nuk ka askush të shtoj diçka sa i përket pikës së tetë të rendit të ditës, kalojmë në pikën e radhës të rendit të ditës:

9. Shqyrtimi dhe aprovimi i Propozim-vendimit të Kryetarit të Komunës për formimin e komisionit për emërtimin e rrugëve, shesheve dhe lagjeve në Komunën e Rahovecit.

Isak Hoti - Pas kërkesave të shumta dhe ankesave që janë bërë në Komunë për emërtimin e rrugëve dhe shesheve, Kryetari e ka pa të arsyeshme që të formoj edhe dy komisione, një është për emërtimin e rrugëve aty ku nuk e kemi përfunduar komplet dhe tjetri është për shqyrtimin e ankesave të qytetarëve të Komunës së Rahovecit, përkatësisht në Drejtorinë e Urbanizmit. Në këto komisione duhet të jenë pesë (5) anëtar për komisionin për ankesa dhe pesë anëtar (5) për komisionin emërtimin e rrugëve, tre anëtar janë nga Kuvendi e dy nga ekzekutivi.

Fehmi Hoxha – Të nderuar, ne e kemi pas komisionin e parë, në kohën kur e ka marr mandatin e parë Kryetari aktual, Smajl Latifi, është vendosur në këtë Kuvend, unë kam qenë edhe atëherë anëtar i Kuvendit edhe është formuar komisioni, procedurat kanë përfunduar të gjitha. Është votuar lista komplet, janë 28-29 rrugë, emrat që janë lënë rezervë sipas ligjit për emërtimin e rrugëve, ku mbikëqyrës dhe implementues ka qenë Agjencioni Kadastral i Kosovës.

Florida Krasniqi - Lidhur me komisionin e emërtimit të rrugëve dhe shesheve, ka pasur familje të cilët kanë pasur vërejtje në emërtimin e rrugëve dhe shesheve të qytetit apo fshatrave, ku janë bërë gabime që duhet të përmirësohen, sepse kanë vendosur emra të njëjtë të dëshmorëve.

Qazim Qeska - Një sqarim, se po shkaktohet konfuzion, po bëhet njëherë një komision për ankesa, mandej komisionin për emërtimin, cili është më i vjetër? Nëse doni të punoni me komisionin për ankesa me emërime të vjetra është diçka tjetër, mirëpo njëherë duhet të formohet komisioni për emërtimin e rrugëve dhe shesheve, pastaj komisioni për ankesa, flas gjithmonë sipas bindjes sime.

Fehmi Hoxha – I nderuar Kryesues, sinqerisht kërkoj falje që po ndërhyjë, ky komision për emërtimin e rrugëve çka ka më bë? A kemi me emërtu rrugë të reja apo ka mu marr me listën rezervë që është 28-29 me ligj?

Isak Hoti - Është e drejtë ekskluzive e Kuvendit, e secilit kuvend brenda kufijve administrativ që të vendos për rrugë të Komunës, pa marr parasysh se cilës listë.

Florida Krasniqi – Të nderuar anëtar të Kuvendit, pse mos të bëjmë ndryshime nëse ka pasur gabime në emërtimin listave të bërë nga komisioni i parë?

Kryesuesi – Të nderuar anëtar të Kuvendit, ja fillojmë me propozime të emrave për komisionin për emërtimin e rrugëve, rrugicave dhe shesheve të komunës së Rahovecit.

Ali Morina – Ne grupi i AAK-së propozojmë znj. Besmire Bytyqi.

Qazim Qeska – Ne grupi i PDK-së propozojmë znj. Afërdita Thaqi.

Fehmi Cena – Ne grupi i LDK-së propozojmë z. Vahid Krasniqi.

Kryesuesi – Ju faleminderit pra emrat e anëtarëve të komisionit për emërtimin e rrugëve, rrugicave dhe shesheve të Komunës së Rahovecit janë: AAK- znj. Besmire Bytyqi, PDK- znj. Afërdita Thaqi, LDK- z. Vahid Krasniqi, kurse dy emrat e ekzekutivit janë: z. Rumir Zhuniqi dhe znj. Bjondina Kleqka.

Ali Zhuniqi – Të nderuar e di që ka shumë rëndësi formimi i këtyre komisioneve dhe e di që ka pas probleme para se me qenë asamblist nga mandati i kaluar, ato probleme i ceki edhe z.Hoxha, problemi është jashtëzakonisht i ndjeshëm. Atëherë unë mendoj që në kuadër të këtij komisioni të përfshihen edhe subjekte që janë më të vogla për arsye se edhe ne mund të japim kontribut në këtë fushë.

Isak Hoti - Në bazë të Udhëzimit Administrativ, është pak keq për partitë e vogla mirëpo ministritë e kanë bërë këtë. Neni 5 i këtij neni përbërja e komuniteteve, në rast thotë se në përbërjen e Kuvendit të Komunës janë të përfaqësuar më shumë etnitete politike me çka bën të pamundur përfshirjen e të gjithë etniteteve në komisione dhe komitete për politikë, atëherë përfaqësuesit do të bëhen në bazë të përqindjes së përfaqësuar në Kuvendin e Komunës.

Kryesuesi - E vë në votim Propozim-vendimin e Kryetarit të Komunës për formimin e komisionit për emërtimin e rrugëve, shesheve dhe lagjeve në Komunën e Rahovecit, me këto emra të propozuar: AAK –

znj. Besmire Bytyqi, PDK- znj. Afërdita Thaqi, LDK- z. Vahid Krasniqi, dhe nga ekzekutivi, z. Rumir Zhuniqi dhe znj. Bjondina Kleqka. Konstatohet se me 2 abstenime dhe të tjerët pro është aprovuar pika e nëntë (9) e rendit të ditës, kalohet në pikën e radhës të rendit të ditës:

10. Shqyrtimi dhe aprovimi i Propozim-vendimit të Kryetarit të Komunës për formimin e komisionit për shqyrtimin e ankesave për emërtimin e rrugëve dhe shesheve në Komunën e Rahovecit.

Kryesuesi – Të nderuar kuvendar, gjithashtu edhe në këtë komision duhet të jenë tre anëtar nga Kuvendi dhe dy nga ekzekutivi, po fillojmë me propozimet.

Ali Morina – Ne grupi i AAK-së propozojmë Rukije Krasniqi

Qazim Qeska – Ne grupi i PDK-së propozojmë z. Munib Durguti.

Fehmi Cena – Ne grupi i LDK-së propozojmë z. Faton Ramadani.

Kryesuesi – I nderuar z. Cena nëse ka mundësi të propozoni një emër të gjinisë femërore për shkak të kuotës, sepse nëse shkojmë kështu atëherë MAPL-ja do na kthejë vendimin për rishqyrtim.

Fehmi Cena - I nderuar kryesues, nëse duam parlamentarizëm pak më shumë, AAK-ja duhet të tërhiqet pak më shumë nga këto komisione se edhe ashtu prej pesë (5) anëtarëve, dy nga ekzekutivi i takojnë AAK-së tash shumicën e kanë ata nëpër komisione dhe kjo po del jodemokratike.

Kryesuesi - Pra emrat e anëtarëve nga ana e Kuvendit për komisionin për shqyrtimin e ankesave për emërtimin e rrugëve, rrugicave dhe shesheve janë: AAK – z. Rukije Krasniqi, PDK- z. Munib Durguti, LDK- z. Faton Ramadani, dhe nga ekzekutivi znj. Saranda Sallteku dhe z. Hasan Përboqi. E vë në votim Propozim-vendimin e Kryetarit të Komunës për formimin e komisionit për shqyrtimin e ankesave për emërtimin e rrugëve dhe shesheve në Komunën e Rahovecit, me këto emra që i ceka më parë: Konstatohet se me 4 abstenime dhe të tjerët pro është aprovuar pika e dhjetë (10). Kalohet në pikën e radhës të rendit të ditës.

11. Informatë mbi menaxhimin e mbeturinave në Komunën e Rahovecit për vitin 2019.

Bjondina Ramaj - Përshëndetje për të gjithë të pranishmit edhe pse kemi pas shumë pikave e kjo është pika e fundit, të gjithë e keni raportin përballë, unë dua të flas në pika të shkurtra kush ka ndonjë pyetje jemi këtu me ju për t'u dhënë përgjigje por do të fillojmë me raportin për gjendjen e mbeturinave. Vështirësitë dhe problemet në sektorin e mbeturinave janë evidente në menaxhim, si në ndarjen, riciklim, trajtim dhe deponim andaj besoj fuqishëm se në koordinim me Komunën e Rahovecit dhe me drejtorinë e Shërbimeve Publike mund të arrijmë që të kemi një sistem funksional dhe ekologjik për menaxhimin e mbeturinave. Sfidat kryesore janë jo vetëm në Komunën tonë por janë pothuajse në gjithë Kosovën, ne jemi munduar pak a shumë që të ballafaqohemi dhe të bëjmë një pastrim apo angazhim të mirëfilltë në gjithë Komunën tonë. Operatorët e menaxhimit të mbeturinave qysh në vitin 2011, Komuna e Rahovecit ka gjithsej 56 mijë e 208 banor, shtrirja e popullatës në komunë është më shumë në zonën rurale se urbane. Ndërmarrjet publike që funksionojnë në Komunën tonë janë "Ekoregjioni" kurse ndërmarrja private është "Ekodrinia". Ne kemi bërë pastrim nga tërë muajt edhe jemi duke i larguar të gjitha pikat evidente, pra i keni të gjitha në raport.

Afrim Dina - Faleminderit znj. Bjondina Ramaj, a ka ndokush ndonjë gjë për të diskutuar, nëse jo atëherë vazhdojmë me pikat e radhës të rendit të ditës:

12. Shqyrtimi dhe aprovimi i Propozim-vendimit të Kryetarit të komunës për formimin e komisionit vlerësues të ofertave për dhënien e pronës së paluajtshme të Komunës në shfrytëzim, afatshkurtër dhe afatgjatë.

Isak Hoti - Atëherë siç e thamë në fillim të seancës që me 3 Prill 2019 është shfuqizuar ligji për dhënien në shfrytëzim të pronës së paluajtshme Komunale dhe është hy në fuqi ligji i ri i cili na obligon ti ndërrojmë edhe komisionet, tani ligji e ka përcaktuar që të jenë pesë (5) anëtar. Kryetari i Komunës i propozon dy anëtar nga ekzekutivi i Komunës, Kuvendi i Komunës i propozon dy (2) anëtar nga Kuvendi i Komunës, ndërsa një (1) anëtar nga sektori joqeveritar i cili propozohet nga sektori joqeveritar lokal, çka do të thotë që ne do t'i ftojmë organizatat joqeveritare-sekretaria do ta sjell një emër. Me 16.02.2018 është marr vendim me numër 595 për formimin e komisionit vlerësues të ofertave për dhënien e pronës së paluajtshme të Komunës në shfrytëzim në afatshkurtër dhe afatgjatë. Vendimi i cili duhet të rishqyrtohet ose përmirësohet

janë këta emra: 1. Refki Kryeziu-PDK; Artan Zenuni –AAK; Masar Popaj-LDK, Afrim Limani-Ekzekutiv, Afrim Oruqi-Ekzekutiv, Saranda Sallteku-Ekzekutiv dhe Feriz Thaqi- Përfaqësues nga OVL-ja. Ndërsa te komisioni i ankesave kanë qenë tre (3) tash duhet të jenë pesë (5).

Dervish Çadraku – Të nderuar a duhet tani ne të japim propozimet e reja apo vetëm duhet të i heqim nga vendimi i vjetër dy emra?

Isak Hoti – Të nderuar vendimi i vjetër shfuqizohet në momentin që ne e aprovojmë vendimin e ri.

Masar Popaj – Të nderuar kuvendar, në këtë komision jam edhe unë, mirëpo mesa e di unë shtatë takime i kemi pas dhe në shtatë takime nuk kam munguar asnjëherë, kurse ka pas raste që disa kolegë nuk kanë qenë të rregullt kanë munguar.

Kryesuesi – Të nderuar tani ju kisha lutur që të na jepni emrat e anëtareve të juaj.

Ali Morina – Ne grupi i AAK-së z. Artan Zenuni.

Qazim Qeska – Ne grupi i PDK-së Refki Kryeziu.

Fehmi Cena - Në fakt z. Masar Popaj ka qenë anëtar i gjertanishëm dhe ai tha diçka, tash udhëheqës i komisionit ka qenë drejtori Afrim Limani, natyrisht që ne propozojmë që Masar Popaj me qenë përsëri se ashtu ka qenë aktiv dhe nuk ka munguar asnjëherë.

Kryesuesi – Të nderuar anëtar të Kuvendit, veç edhe një sqarim të vogël sipas Udhëzimit Administrativ të ri, Kuvendi i ka dy anëtar jo tre, dhe nga ekzekutivi dy, po ashtu duhet të respektohet kuota gjinore.

Ali Morina - Unë kisha propozuar që pasi që jemi grupi më i madh që në këtë komision të mbeten emrat që i propozuam, ndërsa tek komisioni i ankesave ne tërhiqemi nuk e delegojmë asnjë emër i lejmë radhën LDK-ës që të propozojnë ose partive tjera.

Fehmi Cena – Ju lutem tani ku po mbetet performanca, përfaqësuesi i LDK-ës asnjëherë nuk ka munguar ndërsa përfaqësuesi i AAK-ës ka munguar çdoherë, ne çdo herë kur diskutojmë qoftë për mbledhje, plane, raport e kërkojmë performancën, AAK-ja i ka dy përfaqësues tregohuni pak parlamentar.

Ali Zhuniqi – Pasi që kemi ardhur deri në këtë pikë që asnjëri prej subjekteve mos të lëshojmë pe edhe për plotësimin e kuotave gjinore ne kërkojmë që së paku parimet në bazë të ligjit të respektohen andaj propozojmë që votimi të bëhet fshehtas.

Isak Hoti – Të nderuar, në bazë të praktikave ka dy lloje të votimeve, votim të fshehtë dhe votim të hapur, në këtë rast keni të drejtë të votoni sipas propozimit, propozon i pari votohet i pari, kush është për, vjen te i dytë kush është për, e kështu më radhë, pastaj cili merr vota më shumë, dy të parët shkojnë i treti mbetet.

Faton ramadani – Z. Isaku e tha ashtu qysh mendoj ai, por unë mendoj ndryshe, por që po kërkohen dy kam të drejtë dy, kurse z. Isaku po na mohon po thotë vetëm për një kandidat kemi të drejtë të votojmë.

Isak Hoti – I nderuar neni pesë (5) pika 2: në rast së përbërja e Kuvendit të Komunës janë të përfaqësuar me shumë etnitete politike me çka bën të pamundur përfshirjen e të gjithë etniteteve të komiteteve dhe komisioneve, atëherë përfaqësimi do të bëhet në bazë të përqindjes së përfaqësuar në Kuvendin e Komunës. Ai që e ka përqindjen më të madhe, propozon i pari, i dyti nëse i ka më shumë se dy, atëherë propozohen dy, tre, katër e pesë.

Rukije Krasniqi - Propozime të tilla nëpër komisione nuk është vetëm që në këtë mandat kemi pas, kemi pas edhe në mandate tjera, a ju kujtohet se sa herë keni thënë ju po na mbi votoni, nëse ka qenë dy anëtar atëherë veç dy anëtar të propozohen. Ne si Aleancë kemi qenë me shtatë vota dhe kurrë s'kemi qenë në komisione, anëtarët e partive politikë që kanë pas numrin e pjesëmarrjes të anëtarëve të Kuvendit me numër më të madh, ata janë propozuar dhe ata kanë shkuar askush nuk na ka pyet neve.

Sali Sallteku – Të nderuar, atëherë kemi qenë 18, tash nëntë jeni ju nëntë jemi ne, unë po them kështu kryesues në bazë të rregullores mos të maltretohemi më gjatë.

Fehmi Cena - Nëse ekziston mundësia me kalu me vota, hidhe në votim, nëse në hapin e dytë mund të hyn në vota, po hymë në vota kush ka më shumë le të kalojë, nuk jemi kundër, nëse është kundër procedurale shkoni ashtu, por neve do të na keni kundër për dy arsye: Që në vota nuk doni t'i futni dhe nuk ka logjikë juridike për mendimin tim, dhe e dyta nuk jemi që me largu kandidatin, jo pse është i yni por se ka treguar performancë më të mirë në komision.

Besmire Bytyqi – Përshëndetje për të gjithë! Përshëndetje Kryesues! Kështu, ne nuk të shkojmë në votim përderisa i kemi dy të gjinisë mashkullore. Ne duhet t'i kemi emrat paraprakisht se kush do të jetë nga ekzekutivi.

Kryesuesi - Të nderuar, atëherë po shkojmë ashtu si e përcakton Udhëzimi Administrativ, emrat e propozuar për komisionin vlerësues të ofertave për dhënien e pronës së paluajtshme të Komunës në shfrytëzim, afatshkurtër dhe afatgjatë janë: Nga Kuvendi AAK – z. Artan Zenuni , PDK – z. Refki Kryeziu, nga ekzekutivi: Saranda Sallteku dhe z. Artan Asllani, kurse nga shoqëria civile: Sihana Duraku. E qes në votim pikën e dymbëdhjetë (12): Konstatohet se me 15 për, 8 kundër dhe 2 abstenime është aprovuar pika e dymbëdhjetë (12) e rendit të ditës. Kalojmë në pikën e radhës:

13. Shqyrtimi dhe aprovimi i Propozim-vendimit të Kryetarit të Komunës për formimin e komisionit për shqyrtimin e ankesave.

Kryesuesi – Ju lutem të fillojmë me propozimet e emrave edhe për këtë komision

Afërdita Thaqi – Ne nga grupi i PDK-së propozojmë z. Fehmi Hoxha.

Ali Morina – Ne grupi i AAK-së tërhiqemi nga ky komision, ja lëmë radhën kësaj herë LDK-së dhe VV-së.

Fehmi Cena – I nderuari kryesues ne nuk kemi emër për këtë komision.

Ali Zhuniqi – Edhe ne i nderuari kryesues nuk kemi emër për këtë komision.

Ali Morina – Atëherë pasi këta nuk dëshirojnë të jenë pjesë e këtij komisioni, ne e propozojmë znj. Besmire Bytyqi.

Kryesuesi – Atëherë emrat propozuar për formimin e komisionit për shqyrtimin e ankesave janë: Nga Kuvendi AAK- z. Besmire Bytyqi, nga PDK- Fehmi Hoxha, kurse nga ekzekutivi janë: z. Afrim Oruçi dhe z. Besnik Hoti, kurse nga shoqëria civile do t'a sillni emrin në sekretari të Kuvendit që të plotësohet në vendim. E vë në votim pikën e trembëdhjetë të rendit të ditës: Konstatohet se me 15 vota për, asnjë kundër dhe 9 abstenime është aprovuar edhe pika e trembëdhjetë e rendit të ditës. Kalojmë në pikën e radhës të rendit të ditës:

14. Shqyrtimi dhe aprovimi i Propozim-vendimit të Kryetarit të Komunës për dhënien e Laptopave anëtarëve të Kuvendit.

Kryesues – Tani e vë në votim propozimin e Kryetarit që e dha në fillim të mbledhjes sa i përket mos kthimit të laptopave pas përfundimit të mandatit. Konstatohet se në mënyrë unanime është aprovuar pika e katërbëdhjetë (14) e rendit të ditës.

Kryesuesi – Kuvendar të nderuar ju falënderoj të gjithëve për kontributin e dhënë, mirupafshim në mbledhjet e radhës!

Mbledhja e Kuvendit ka përfunduar në ora 15:40

01 Nr. 2334

Rahovec, 30.07.2019

Procesmbajtësi

Skender Hamza

